



Дала Ийсагахула

Яхъя-векална

ДОВЗИЙТИНАРГ

Дала Ийсагахула Яхъя-векална довзийтинарг Ийсан нах Iазапехъ хиллачу хенахъ яздина дара, хIунда аьлча уьш Дала леррина кьобалвина Ийса Веза Эла хиларх тешнера. Яздархочун коьрта Iалашонаш ю дешархой иракарахIиттор а, царна дегайовхо ялар а, иштта шаьш баланах а, Iазапаш а ловш долчу хенахъ кхидIа тешаме дисаре кхайкхар а.

Тептар тIехъ йоккха меттиг дIалоцуш ду Дала довзийтина цхьадолу гIуллакхаш а, Дала хIиттийна цхьадолу суьрташ а. Уьш билгалонашкахъ дуьйцуш ду. Ийсах тешна болу хIетахьлера нах цу билгалонех кхетар бара, амма кхечарна массарна а церан маьIна девзар дацара. Мукъаман дакьош санна, кху тептаран ойланаш тайп-тайпана суьрташ хIиттарца мосуьйттазза карлайоуш ю. Тептаран маьIна ма-дарра муха дан деза аьлла, тайп-тайпана хетарш делахъ а, цуьнан коьрта ойла шеко йоцуш иштта ю: Веза Эла волчу, Ша леррина Кьобалвинчуьнгахула Дала тIаьхьара а Шен мостагIашна тIехъ (царна юкьахъ иблис а долуш) кхоччуш толам боккхур бу. И толам баккхар чекхдаьллачул тIаьхьа, Шена тешаме болу нах декьалбийр бу Цо, керла стигал а, керла латта а луш.

Дешхьалхе

1 ¹Шен ялхошна кестта хила дезарг довзийтархьама, Ша леррина кьобалвинчу Ийсагахула гучуяьккхира Дала и кьайле. Цо иза Шен ялхо волчу Яхъяга дIахайитира, цунна тIе Шен малик а дахийтина. ²Яхъяс ма-дарра дийцира Делан дашах а, Дала леррина кьобалвинчу Ийсас динчу тоьшаллех а лаьцна шена мел гинарг. ³Декъала ву хIара Делера бинчу хааман дешнаш доьшург. Декъала бу, цу хааме ла а ду-гIуш, хааман тептар тIехъ яздинарг лардийраш, и дерриге а кестта хир долу дела.

Ийсах тешначу динан ворхI тобане дахьийтина маршаллаш

⁴Векал волчу Яхъяс Асиа-махкарчу динан ворхI тобане яздо:

Делан дика а, синпаргIато а хуьлийла шуна даим волуш волчу а, хилла волчу а, вогIун волчу Делера а, иштта Цуьнан Iаршана* хьалха лаьтташ долчу ворхI синера а, ⁵билгала бакъволу теш волчу а, дуьххьара белла-чарна юкъара денвелла волчу а, лаьттарчу паччахьийн Олахо волчу а Дала леррина кьобалвинчу Ийсагара а.

Вай дукха а дезаш, вайн кьинойх Шен цIийца вай кIелхьара а даьхна, ⁶Цо вайх динан дайн пачхьалкх йина, Шен Да волчу Далла хьалха вайга гIуллакх дайтархьама. Сийлалла а, нуьцкъалалла а хуьлийла Цуьнан ер-риг а тIейогIучу заманна. Амин.

⁷ Хьажал, Иза мархашца охьавуссур ву, тIаккха массарна гур а ву Иза, ур-атталла Цунах гоьмукъ чекхбаьккхинчарна а тIехъ.

Лаьттарчу дерриге а тукхамаша белхар дийр ду Цунах.

Иза иштта билгал хир а ма ду! Амин!

⁸«Со ву массо а хIума Долийнарг а, чекхдоккху Верг а, — боху Везачу Дала. — Со ву волуш волу а, хилла волу а, вогIун волу а Нуьцкъалниг».

Дала леррина Кьобалвинчо Ша Яхъяна гучуовоккху

⁹Шу а, шун ваша Яхъя волу со а цхьатерра Ийсах тешарна, шуьца цхьаьна Цуьнан олаллехъ болчара хьогьучу баланашкахъ дакъа лаца доьналла долуш ву со. Иштта, Делан дош дIасадаржорна а, Ийсах тоьшалла дарна а, таIзар а деш, Патмас цIе йолчу гIайренна тIе вахийтинера со. ¹⁰Везачу Элана леринчу дийнахъ Делан Са суна тIе доьссира, тIаккха сайна тIехьа чIогIа аз хезира суна, турби чуьра схьадолуш санна. ¹¹Цо бохура: «Хъайна гушдерг тептар тIе дIа а яздай, динан ворхIе а тобанийн гуламашка дIадахьийта. И тобанаш ю хIокху гIаланашкахъ: Эпасехъ, Симранехъ, Паргамехъ, Тхьайтирехъ, Сардисехъ, Палидалпехъ, Лаудикехъ».

¹²И суна хезнарг хьенан аз ду те аьлла, со юяхьаьжира. Со юяхьаьжча, суна гира деших бина ворхI стогар. ¹³Ткъа оцу ворхI стогарна юкьахъ лаьтташ «адабийн кIантах тера цхьаь» вара. Цунна тIехъ еха бедар яра, ткъа цуьнан неххана гонах хьарчийна деших дина доьхка дара. ¹⁴Цуьнан

* ^{1:4} *Iарш* — Делан стигалахъ йолу олаллин меттиг.

^{1:4} Арадаккхар 3:14; Довзийтинарг 4:8. ^{1:5} ЕшаI-ЯхIу 55:4; Забур 88:28. ^{1:6} Арадаккхар 19:6; Довзийтинарг 5:10. ^{1:7} Даниал 7:13; Маттай 24:30; Марк 13:26; Лака 21:27; 1 Тассалникахошка 4:17; Закри-ЯхIу 12:10; Яхъя 19:34, 37. ^{1:8} Довзийтинарг 22:13; Арадаккхар 3:14. ^{1:13} Даниал 7:13; Даниал 10:5. ^{1:14} Даниал 7:9. ^{1:14, 15} Даниал 10:6.

коьрта тІера месаш, тІаргІа а, ло а санна, кІайн яра. Біаьргаш а дара Цуьнан йогу алу санна. ¹⁵Цуьнан когаш пешахь лалийначу, кьегачу цІастанах тера бара. Чухчарин* гІовгІа санна дара Цуьнан аз. ¹⁶Цуьнан аьтту куьйгахь ворхІ седа бара. Цуьнан багара схьадолура шинна а агІор ира долу тур. Цуьнан юьхь а, шен нуьцкьалаллин нуьрехь болу малх санна, лепаш яра. ¹⁷Сайна и гича, велча санна, Цуьнан когашка вуьйжира со. Ткьа Цо, суна тІе аьтту куьг а диллина, соьга элира: «Ма кхера. Со ву Хьалхарниг а, ТІаьххьарниг а. ¹⁸Со ву дийна Верг. Со велла вара, амма хІинца Со ерриг а тІейогІучу заманна дийна ву. Сан карахь ду Јожаллин а, эхартан а догІанаш. ¹⁹Иштта, дІаязде хьайна гиначух а, долуш долчух а, хиндолчух а лаьцна. ²⁰Сан аьтту куьйгахь хьуна гиначу ворхІ седанан а, ворхІ дашо стогаран а кьайле иштта ю: ворхІ седа — уьш Іийсах тешначийн динан ворхІ тобанан маликаш ду бохург ду. Ткьа хьуна гина болу ворхІ стогар — уьш ворхІе а динан тобанийн гулам бу».

Эпас-гІаларчу динан тобане яздина кехат

2 ¹«Эпас-гІаларчу динан тобанан малике дІаязде: Иштта боху, Шен аьтту куьйга ворхІ седа схьа а лаьцна, деших бина болчу ворхІ стогарна юкктехула лелаш Волчо: ²„Девза Суна шун гІуллакхаш. Хаьа Суна аша кьахьобгийла а, шу доьналла долуш дуйла а, мекара адамаш аша ловш доцийла а. Шашь векалш ду бохурш а аша зийна, ткьа уьш харцІуьйш хилар а шуна хьйна. ³Шу доьналла долуш ду, Сан дуьхьа аша баланаш хьийгира, амма шу ца дуьйхира. ⁴Делахь а, шуна дуьхьалдаккха хІума ду Сан: аша шайн дуьхьарлера безам дІатесна. ⁵Иштта, шашь мичара охьаэгна дага а даийтий, метта а дуьйлий, шашь юьхьанца лелийна долу гІуллакхаш леладе. Нагахь шашь далийтинчу кьинойх шу дІа ца дерзахь, шу долчу а веана, Ас меттахбоккхур бу шун стогар. ⁶Делахь а цхьа дика хІума ду шун: никласхойн гІуллакхаш Суна цадезаре терра, шуна а уьш ца дезаш хилар.

⁷Лергаш долчо ладугІийла Делан Сино динан тобанашка бохучуьнга:

‘Тоьллагчунна бакьо лур ю Ас Делан ялсаманина юкктехь лаьтташ долчу дахаран дитта тІера стом баа’».

Симран-гІаларчу динан тобане яздина кехат

⁸Симран-гІаларчу динан тобанан малике а дІаязде:

«Иштта боху, хьалха вала а велла, ткьа хІинца дийна волчу хьалхара а, тІаьххьара а Волчо: ⁹„Суна евза шун халонаш а, шун кьоьлла а, делахь а

* ^{1:15} Чухчари — лакхара охьадогІу дуккха а долу хи.

^{1:15} Яхьазкхиал 1:24; 43:2. ^{1:17} ЕшаІ-ЯхІу 44:6; 48:12; Довзийтинарг 2:8; 22:13.

^{2:7} Доладалар 2:9; Довзийтинарг 22:2; Яхьазкхиал 28:13; 31:8 (Грекийн).

^{2:8} ЕшаІ-ЯхІу 44:6; 48:12; Довзийтинарг 1:17; 22:13.

шу-м хьал долуш ду. Иблисан гуламах болчара, шашь Делан нах болчу жуьгтех боццухехь, царах ду бохуш, шух лаьцна дуьйцу вон хабарш а Суна хууш ду. ¹⁰Шашь лан дезар долчу цхьана а хІуманаш ма кхера. Иштта, шу зерхьама, шух цхьадерш иблисо набахти чу даладойтур ду. ТІаккха иттех дийнахь баланаш ловр бу аша. Шашь делла дІадовлалц тешаш хилаш, тІаккха Толаман таж санна, Аса шуна хедар доцу дахар лур ду.

¹¹Лергаш долчо ладугІийла Делан Сино динан тобанашка бохучуьнга: ‘Толам баьккхинчун шолгІа валар хир дац’».

Паргам-гІаларчу динан тобане яздина кехат

¹²«Паргам-гІаларчу динан тобанан малике а дІаязде:

Иштта боху Шен карахь шинна а агІор ира долу тур Долчо: ¹³„Девза Суна иблисан олаллин гІантана гонах шу дехаш хилар. Аша Сан цІе ларамехь а лелийна, Сох долу шун тешар дІа а ца даьлла, ур-атталла иблис дехаш долчу шун гІалахь Сан тешаме теш волу Антапи вийначу хенахь а. ¹⁴Делахь а, шуна дуьхьалдаккха цхьацца хІума ду Сан. БалиІаман хьехамаш тІелаьцна болу цхьаболу нах бу шуна юкьахь. Израилхошка кьилахь долу гІуллакхаш леладайтта Іамийнера цо Балакх-паччахь. Цара, цІушна сагІина лерина еана хІума а йоуьйтуш, Далла хьалха сийсаза долу хІума леладойтура исраилхошка. ¹⁵Иштта, никласхойн хьехамаш ларбеш болу цхьаболу нах а бу шуна юкьахь. ¹⁶Метта а дуьйлий, Соьгахьа юхадерза! Нагахь Ас бохург аша ца дахь, Со кестта вогІур ву шу долчу. ТІаккха Сайн багара схьадолучу туьраца летар ву Со царах.

¹⁷Лергаш долчо ладугІийла Делан Сино динан тобанашка бохучуьнга:

‘Толам баьккхинчунна кьайлаьккхинчу „манна“ олучу кхачанан буьртигийн дакьа лур ду Ас. Цунна кІайн тІулг а лур бу Ас, тІеязийна керла цІе а йолуш. И цІе цхьанна а хуур яц, иза йолчунна бен’».

Тхьайтир-гІаларчу динан тобане яздина кехат

¹⁸«Иштта Тхьайтир-гІаларчу динан тобанан малике а дІаязде:

Иштта боху біаьргаш цІеран алу санна а, когаш кьегачу цІастанах санна а болчу Делан КІанта. ¹⁹„Суна девза шун гІуллакхаш а, безам а, тешар а, аша гІо дар а, шу доьналла долуш хилар а. Иштта Суна хаьа шун тІаьхьарлера гІуллакхаш хьалха дина долчу гІуллакхел сов дуйла а. ²⁰Ткьа шуна дуьхьалдаккха иштта хІума ду Сан. Делера хаам болуш ю бохучу Изабал цІе йолчу зудчунна дан магош доцу гІуллакхаш дан некь ло аша. Шен хьехамашца Сан ялхой тилабо цо, цаьрга сийсаза долу хІуманаш а леладойтуш, цІушна сагІина еана хІума а йоуьйтуш. ²¹Аса Сайна тІеерза

^{2:11} Довзийтинарг 20:14; 21:8. ^{2:14} Лелар 22:5, 7; 31:16; Карлабаьккхинарг 23:4; Лелар 25:1-3. ^{2:17} Арадаккхар 16:14, 15; 16:33, 34; Яхьа 6:48-50; ЕшаІ-ЯхІу 62:2; 65:15. ^{2:18} Даниал 10:6. ^{2:20} Сулим 16:31; Сулим 9:22, 30.

хан еллера цунна, амма цунна ца лаа ша лелийначу сийсазчу гүллакхех дIаерза. ²²Хинца Ас цамгарийн Iазап хьобгуйтур ду цуьнга. Цуьнца цхьаьна кылахь долу гүллакхаш лелийнарш а боккхачу баланехь хир бу, шаьш цуьнца лелийначу гүллакхашна дохко а бевлла, уьш Суна тIе ца берзахь. ²³Цуьнан бераш а хIаллакдийр ду Ас. ТIаккха кхетар бу динан массо а тобанашкахь берш, шайн дегнаш а, ойланаш а зуйш верг Со хиларх. Шуна хIоранна а, шун гүллакхашка хьаьжжина, хьакь дерг дIалур ду Ас.

²⁴Ткъа, кхечу наха туьдуш ма-хиллара, «иблисан кьайленийн кIоргенаш» шайна евзина доцучу а, Изабалан хьехамашна тIаьхьахIиттина доцучу а шуьга, тхьайтирхойх кхиболчаьрга, Ас боху: «Лан ницкъ кхочур боцу кхийолу халонаш тIе ца йохку Ас шуна. ²⁵Ткъа шу, Со схьаваллалц, шайн долуш дерг лар а деш, лела». ²⁶⁻²⁸Толам а боккхуш, Сан гүллакхаш чекхдовллалц кхочушдеш волчунна, Сан Дас Суна яларе терра,

«кхечу кьаьмнех болчарна тIехь олалла дан бакъо лур ю Ас.

Цо аьчка гIожаца царна тIехь олалла дийр ду,
кхийра пхьегIаш санна, отур а бу уьш».

Цунна лур бу Ас Iуьйренан седа.

²⁹Лергаш долчо ладугIийла Делан Сино динан тобанашка бохучуьнга“».

Сардис-гIаларчу динан тобане яздина кехат

3 ¹«Сардис-гIаларчу динан тобанан малике а дIаязде: Иштта боху Шегахь Делан ворхI Са а, ворхI седа а Болчо: „Девза Суна шун гүллакхаш. Аша, шаьш дийна долуш санна, цIераш лелайо, амма шу делла ду. ²Сама а довлий, шайна чохь дисина долу тешар чIагIде, иза хIаллакьхилале. ХIунда аьлча Суна карийна, аша деш долу гүллакхаш Сан Далла хьалха кхоччуш чекхдевлла цахилар. ³Шаьш тIеэцна болу а, шайна хезна болу а хьехамаш дагахь латтабе! Уьш лар а бе, шайн кьиношна дохко а довлий, Далла тIе а дерза. Нагахь шу сама ца довлахь, кьу санна, шуна ца моьттучу хенахь вогIур ву Со. ⁴Бакьду, шуна юкьаьх масех стаг ву шайн бедарш кылахь долу гүллакхаш дарца бехъяза. Уьш, кIайн духарш а дуьйхина, Соьца лелар бу, хIунда аьлча уьш иштта лела хьакь долуш бу. ⁵Толам баьккхинчунна тIе кIайн духар духур ду. Цуьнан цIе дахаран тептар тIера Ас дIа а йойур яц. Иза Сан долахь хиларх тоьшалла а дийр ду Ас Сайн Дена а, Цуьнан маликашна а хьалха.

⁶Лергаш долчо ладугIийла Делан Сино динан тобанашка бохучуьнга“».

^{2:23} Забур 7:10; Ярми-ЯхIу 17:10; Забур 61:13. ^{2:26, 27} Забур 2:8, 9 (Грекийн).

^{3:3} Маттай 24:43, 44; Лака 12:39, 40; Довзийтинарг 16:15. ^{3:5} Арадаккхар 32:32, 33; Забур 68:29; Довзийтинарг 20:12; Маттай 10:32; Лака 12:8.

Палидалпи-гIаларчу динан тобане яздина кехат

⁷«Палидалпи-гIаларчу динан тобанан малике а дIаязде:

Иштта боху веза а, билггал бакъ а волчу Шен карахь Даудан догIа Долчо. Цо неI дIаястахь, цхьаьнгте а иза дIакъовлалур яц. Цо неI дIакъовлахь, цхьаьнгте а иза дIаясталур яц. ⁸„Девза Суна шун гүллакхаш. Хьовсал! Цхьаьнгте а дIакъовлалур йоцу неI дIайиллина Ас шуна хьалха. Шун ницкъ кIезиг белахь а, аша Сан дош а лардина, Со дIа а ца тесна. ⁹Гой шуна! Аьшпаш а буттуш, шаьш боццушехь, жуьгги ду бохуш болу иблисан гуламах берш Ас шуна хьалха дIахIиттор бу, шун когашка уьш охьа а тоIуьйтуш. Хуур ду царна, Суна шу дезийла. ¹⁰Добналла долуш хила аьлла, Аса шайна дина омра аша лардина дела, Аса а лардийр ду шу, лаьттахь дехаш долу адамаш зерхьама, кху дуьнен чу массанхьа а баланаш тIебоуьйтур болчу заманах. ¹¹Кестта вогIур ву Со. Шайн долуш дерг ларделаш, цхьаьнгте а шайгара толам баккхаран таж дIа ца даккхийта. ¹²Толам баьккхинарш Сан Делан цIа чохь бIогIам хилла дIахIуьттур бу, цу чуьра кхин ара а бевр бац. Царна тIехь Сайн Делан цIе а язйийр ю Ас, Сайн Делан гIалин цIе а язйийр ю. Иза Сан Делера стигалара охьайогIуш йолчу Ярушалайм-гIалин цIе хир ю. Сайн керла цIе а язйийр ю Ас царна тIехь.

¹³Лергаш долчо ладугIийла Делан Сино динан тобанашка бохучуьнга“».

Лаудика-гIаларчу динан тобане яздина кехат

¹⁴«Лаудика-гIаларчу динан тобанан малике а дIаязде:

Иштта боху Ша Амин волчу, Дала кхоьल्लीна долчун Хьоста Ша волчу, тешам а болуш, билггал бакъволчу Тешо: ¹⁵„Девза Суна шун гүллакхаш — шу я шийла а дац, я довха а дац. Я шийла, я довха делара шу! ¹⁶Довха а, шийла а доцуш, шу мела хиларна, Ас Сайн багара а дIадохур ду шу. ¹⁷ХIунда аьлча аша боху: «Тхо дехаш а ду, хьал долуш а ду, тхуна оьшуш хIумма а дац». Ткъа шу ца кхета шаьш ирс дайна а, декъаза а, кьен а, бIаьрзе а, дерзина а хиларх! ¹⁸Ас иштта хьехам бо шуна: шаьш хьал долуш хилийтархьама, цIергахь дахчийна деши эца шайна Соьгара. КIайн духар а эца шайна, иза, тIе а дуьйхина, шайн эхье меттигаш дIахьульярхьама! Хьакхар а эций, иза бIаьргех хьакха, бIаьрса дайитархьама! ¹⁹Сайна везарг, метта а валош, таIзарца нисво Ас. Цундела, дикане а кхийдаш, даггара Далла тIедерза! ²⁰Хьовсал! Со, неIарах пIелг а бетташ, лаьтташ ву. Сан аз а хезна, неI дIайиллинчун цIа чу вер ву Со. Цуьнца цхьаьна хIума юур ю Ас, ткъа иза Соьца шуьне хуур ву. ²¹Толам а баьккхина, Сайн Ден Iаршана уллохь долчу пачахьан гIанта тIе Со охьахааре терра, толам

^{3:7} ЕшаI-ЯхIу 22:22; Аюб 12:14. ^{3:9} ЕшаI-ЯхIу 49:23; 60:14; ЕшаI-ЯхIу 43:4.

^{3:12} Довзийтинарг 21:2; ЕшаI-ЯхIу 62:2; 65:15. ^{3:14} Киданаш 8:22. ^{3:19} Киданаш 3:12; Iебархошка 12:6.

баьккхинчунна бакъо лур ю Ас Сайн Іаршана уллохь долчу паччахъан гІанта тІе охъахаа.

²²Лергаш долчо ладугІийла Делан Сино динан тобанашка бохучуьнга“».

Стигаларчу Іаршана гонах

4 ¹Цул тІаьхъа со хъалахъаьжира. Стигалахь дІаеллаелла неІ гира суна. Хъалха а хезна долу, турбана чуьра арадолуш санна долу, аз хезира суна. Цу озо соьга бохура: «Хъалавала кхуза, кхул тІаьхъа хила дезарг гойтур ду Ас хъуна». ²Цу сохъта суна тІе Делан Са доьссира. Тіаккха суна гира стигалахь лаьтташ йолу Делан Іарш, шена тІехь охъахиьна Верг а волуш. ³Цу охъахиьна Волчун юьхъсибат, «яспис», «сардис» цІе йолу де-за тІулгаш санна, можачу а, цІечу а басахь лепара. Цуьнан гІантана гонах, «изумруд» цІе йолу тІулг санна, лепаш стелаІад дара. ⁴Іаршана гобаьккхина кхин а ткъе диъ паччахъан гІант дара. Царна тІе хиьна ткъе виъ къано вара. Къаношна тІехь кІайн духар дара. Церан кортош тІе диллина дашо таьжнаш дара. ⁵Цу Іаршах схъадетташ стелахаьштиг а дара, схъахезаш аьзнаш а дара, серладуьйлуш детташ ткъес а дара. ГІантана хъалха богуш ворхІ къуьда бара. Уьш Делан ворхІ Са ду. ⁶Цу Іаршана хъалха чекх са гучу ангалих тера болу ангалин хІорд бара.

Ткъа Іарш лаьттачу меттигна юккъехь а, Іаршана гонах а лаьтташ диъ дийнат дара. Хъалх̄а а, тІех̄а а шорта бІаьргаш дара церан. ⁷Дийнатех цхъаь лобмах тера дара. ШолгІа дийнат старгІанах тера дара. КхозлагІчу дийнатан, адаман санна, юьхь яра. ДоьалгІаниг тІемаьйлачу аьрзунах тера дара. ⁸Цу деъа а дийнатан хІораннан а гонах ялх-ялх тІам бара, ткъа царна чуьра схъакъегаш бІаьргаш бара. Цара, дийнаххьий, буьйсанный, сацам а боцуш, кхойкхура:

«Веза ву, веза ву, веза ву Веза Эла,
хилла волу а, волуш волу а, вогІун волу а
массо ницкъийн Веза Дела», — бохуш.

⁹Цу дийнаташа Іаршана тІе хиьна волчу, ерриг а тІейогІучу заманна а вехаш Волчун сийдеш, Иза ваз а веш, баркаллаш мосазза олу а, ¹⁰и ткъе виъ къано Іаршана тІехь хиьна Волчунна хъалха охъа а вужий, ерриг а тІейогІучу заманна вехаш Волчунна суждане воьду. Цара, шайн таьжнаш Іаршана хъалха охъа а дохкуш, олу:

¹¹ «Хъакъ долуш ву Хьо, тхан Веза Эла волу Дела,
сийлалла а, ларам а, ницкъ а дІаэца.

ХІунда аьлча Ахь кхоьллина ду дерриг а.

И дерриг а Хъан лаамца долуш а ду, кхоьллина а ду».

^{4:2, 3} Яхъазкхиал 1:26-28; 10:1. ^{4:5} Арадаккхар 19:16; Довзийтинарг 8:5; 11:19; 16:18; Яхъазкхиал 1:13; Довзийтинарг 1:4; Закри-ЯхІу 4:2. ^{4:6} Яхъазкхиал 1:22. ^{4:6, 7} Яхъазкхиал 1:5-10; 10:14. ^{4:8} Яхъазкхиал 1:18; 10:12; ЕшаІ-ЯхІу 6:2, 3.

Тептар а, Іахар а

5 ¹Тіаккха Іаршана тІехь охъахиьна Іаш Волчун аьтту куьйгахь хъарчийна тептар гира суна. Цу хъарчийначу тептаран шинна а агІор йозанаш дара. И тептар, ворхІ мухІар а тоьхна, дІакъевлина дара. ²Ницкъболу малик а гира суна. Цо, чІогІачу озаца кхайкхам беш, хойтура: «Мила ву, хІокху тептар тІера мухІарш дІа а даьхна, иза дІаделла хъакъ верг?» ³Стигалахь, лаьттахь, я лаьтта бухахь* цхъаннан а йиш яцара и тептар дІаделла а, я цу тІе хъажа а. ⁴И тептар дІа а диллина, иза деша а, я цу тІе хъажа а цхъа а хъакъ цахиларна, со дуккха а вилхира. ⁵Оцу къанойх цхъаммо элира соьга: «Ма велха! ХІара ду ЯхІудан тайпанах долу Лом: Даудан Орам. Цо толам баьккхина, Цуьнан йиш ю цу тептар тІера ворхІ мухІар дІадаккха а, иза дІаделла а».

⁶Тіаккха со дІахъаьжча, суна гира и Іарш лаьттачу меттигна юккъехь, цу дийнаташна а, къаношна а юккъехь лаьтташ болу Іахар. Иза, сагІина лерина бийна болуш санна, бара. Цуьнан ворхІ маІа а, ворхІ бІаьрг а бара. Дерриг а лаьтта тІедахийтина долу Делан ворхІ Са дара уьш. ⁷Іахаро Іаршана тІе хиьна Волчун аьтту куьйгара и тептар схъайицира. ⁸Тіаккха, Цо и тептар караэцча, диъ дийнат а, ткъе виъ къано а Іахарна хъалха охъавуьйжира. Цаьргахь хІорангахь а мерз-пондарш а, дашо боганаш а дара. И боганаш хаза хьожа йогІучу хІуманаш дуьзна дара. Боганаш чохь дерш Делан долахь болчеран доІанаш дара. ⁹Цара, керла эшар а локхуш, бохура:

«Хъакъ долуш ву Хьо,
и тептар схъа а эцна,
цу тІера мухІарш дІадаха,
хІунда аьлча Хьо вийна вара.
ХІора тайпанашна а, меттанашна а, хІора халкъана а,
къомана а тІера
Делан дуьхъа Хъайн цІий Іанорца адамашна тІера мах
дІабелира Ахъа.

¹⁰ Динан дайн пачхьалкх царах йина Ахъа,
цаьрга Хъайна гІуллакх дайтархъама.
Ткъа цара кху Лаьтта тІехь паччахъалла дийр ду».

¹¹Суна дуккха а маликаш гира, церан аьзнаш а хезира. Уьш Іаршана а, цигахь долчу дийнаташна а, къаношна а гонах дара. Дагарлур доцуш,

* ^{5:3} Лаьтта бухахь — иза эхартехь бохург ду (хъажал 1:18).

^{5:1} Яхъазкхиал 2:9, 10; ЕшаІ-ЯхІу 29:11. ^{5:5} Доладалар 49:9; ЕшаІ-ЯхІу 11:1, 10. ^{5:6} ЕшаІ-ЯхІу 53:7; Закри-ЯхІу 4:10. ^{5:8} Забур 140:2. ^{5:9} Забур 32:3; 97:1; ЕшаІ-ЯхІу 42:10. ^{5:10} Арадаккхар 19:6; Довзийтинарг 1:6. ^{5:11} Даниал 7:10.

эзарнашкахь дукха дара и маликаш — эзарзза эзарнаш. ¹²Цара, аз чIагI а деш, олура:

«Бийна болу Iахар хьакъ долуш бу
нуьцкъалалла а, хьал а, хьекъалалла а, чIагIо а,
ларам а, сийлалла а, хастам а дIаэца».

¹³Стигалахь а, лаьттахь а, лаьттана бухахь а, хIорда тIехь а Дала кхоьллинчу хIора хIумано а — царна чохь долчу массо хIумано а — олуш хезира суна:

«Хастам, ларам, сийлалла, олалла ерриг а тIейогIучу заманна хуьлийла
Iаршана тIехь хиьна Волчун а, Iахаран а».

¹⁴Ткъа цу деъа а дийнато олура: «Амин». Къаной, охьа а эгна, суждане бахара.

ВорхI мухIар дIадаккхар

6 ¹ТIаккха суна гира Iахаро ворхI мухIарх цхьаь дIадоккхуш. Юха суна хезира цу деа дийнатах цхьаммо стигала къекъаш санна долчу озаца олуш: «Схъавола!» ²Со дIахьаьжча, суна кIайн дин гира. Цу тIехь, карахь Iад а долуш, бере вара. Цуьнга толаман таж делира. ТIаккха и толам боккхуш верг толам баккха вахара.

³Iахаро шолгIа мухIар дIадаьккхича, суна хезира шолгIачу дийнато олуш: «Схъавола!» ⁴ТIаккха расха болу кхин дин арабелира. Цу тIе хиьна волчунна бакъо елира Лаьттара машар бохо а, адамашка вовшийн дайийта а. Оцу беречуьнга доккха тур делира.

⁵Iахаро кхоалгIа мухIар дIадаьккхича, суна хезира кхоалгIачу дийнато олуш: «Схъавола!» Со дIахьаьжча, суна Iаьржа дин гира. Цу тIехь бере вара, цуьнан карахь терза дара. ⁶Деа дийнатана юкъяра адаман санна долу аз хезира суна: «Цхьана дийнан алапа долччул ахча а луш, кIен деман цхьа кана я мекхан деман кхо кана схъаоьцу. Зайтдаьтта а, чагIар а талха ма де!»

⁷ТIаккха Iахаро доьалгIа мухIар дIадаьккхича, суна хезира доьалгIачу дийнатан озо олуш: «Схъавола!» ⁸Со дIахьаьжча, сира дин гира суна. Цунна тIехиьна «Южалла» цIе йолу бере вара, шена тIаьхьахIоьттина эхарт а долуш. Царна бакъо елира Лаьттарчу адамийн доьалгIа дакъа туьрах а, мацаллах а, цамгарех а далийта а, иштта Лаьттарчу акхарошка уьш дайийта а.

⁹Цо пхоьалгIа мухIар дIадаьккхича, сагIа доккхучу кхерчана бухахь Делан дош кхайкхор бахъанехь а, цара до тоьшаллаш лардар бахъанехь а дайина хилла синош гира суна. ¹⁰Уьш айдинчу озаца кхайкхира: «Мел Iийр ву те Хьо, Хьалдолу Эла, веза а, тешаме а Верг, Лаьттахь бегахь болчарна кхел ца еш а, тхан ций Iанорна царна таIзар ца деш а?» — аьлла. ¹¹ТIаккха царна хIоранна а кIайн духар делира. Цаьрга элира, кхин а кIеззиг йолчу ханна сатоха аьлла. Иштта хила дезара, цаьрга терра Iийсана

^{6:2} Закри-ЯхIу 1:8; 6:3, 6. ^{6:4} Закри-ЯхIу 1:8; 6:2. ^{6:5} Закри-ЯхIу 6:2, 6. ^{6:8} Яхъазкхиал 14:21.

гIуллакх деш болчу а, уьш санна байина хин болчу а, динан вежарийн терахь кхочушхиллалц.

¹²Суна гира Iахаро йолхалгIа мухIар дIадоккхуш. ТIаккха чIогIа мохк бегийра. Малх а, Iаьржачу тIергIан духар тIедуьйхича санна, кхоьлира. Стигалара бутт а, ций санна, цийбелира. ¹³ЦIеххьана баьллачу чехкачу мохо инжиран дитташна тIера хилаза долу церан стоьмаш эгош санна, стигалара седарчий а Лаьтта тIе охьайигира. ¹⁴Стигал а, хьарчийна долу тептар санна, дIа а хьаьрчина, дIахьульелира. ХIора лам а, гIайре а метта-хьаьккхира. ¹⁵Лаьттара паччахьаш а, церан уллоранаш а, тIеман хьаькамаш а, хьалдерш а, нуьцкъалнаш а, массо леш а, паргIат берш а хьехашна чохь а, чIажашна чохь а дIалевчкьира. ¹⁶Цара лаьмнашка а, тархашка а бохура: «Тхуна тIе а эгий, дIахьулдейша тхо Iарша тIехь хиьна Волчунна гарх а, Iахаран таIзарх а. ¹⁷Цара таIзар даран къематде тIедеана. Иза хьаьнга лалур ду те?»

МухIар тIетохарца билгалваьккхина волу цхьа бIе шовзткъе виь эзар стаг

7 ¹Цул тIаьхьа суна диь малик гира. И маликаш лаьттан еа а агIор лаьт-таш дара. Цара Лаьттан еа маьIпера хьокху биь мох дIалаьцнера, иза я лаьттана тIе, я хIордана тIе, я цхьанна а диттана тIе ца бахийтархьама. ²ТIаккха кхин а цхьа малик гира суна. Иза малхбалехьара хьаладолуш дара. Цуьнан карахь дийна волуш волчу Делан мухIар дара. Оцу малико лаьттана а, хIордана а зулам дан бакъо еллачу деа малике, мохь туххуш, айдинчу озаца элира: ³«Вайн Далла гIуллакх деш болчеран хьаьжнаш тIе мухIар тоххалц, зулам ма делаьш я лаьттана, я хIордашна, я дитташна». ⁴И мухIар а тоьхна, билгалваьккхинарг маса стаг ву олуш а хезира суна. Уьш исраилхойн массо а тIаьхьенах волу цхьа бIе шовзткъе виь эзар стаг вара.

⁵ Иштта, ЯхIудан тIаьхьенах волчу шийтта эзар стагана тIе а мухIар тоьхна;

Раабанан тIаьхьенах а — шийтта эзар стагана;

Гадин тIаьхьенах а — шийтта эзар стагана;

⁶ Ашаран тIаьхьенах а — шийтта эзар стагана;

Напталан тIаьхьенах а — шийтта эзар стагана;

Маннашан тIаьхьенах а — шийтта эзар стагана;

⁷ ШимIин тIаьхьенах а — шийтта эзар стагана;

Левин тIаьхьенах а — шийтта эзар стагана;

Иссарханан тIаьхьенах а — шийтта эзар стагана;

^{6:12} Довзийтинарг 11:13; 16:18; ЕшаI-ЯхIу 13:10; Юал 2:10, 31; 3:15; Маттай 24:29; Марк 13:24, 25; Лака 21:25. ^{6:13, 14} ЕшаI-ЯхIу 34:4. ^{6:14} Довзийтинарг 16:20.

^{6:15} ЕшаI-ЯхIу 2:19, 21. ^{6:16} ХIушаI 10:8; Лака 23:30. ^{6:17} Юал 2:11; Мальаки 3:2.

^{7:1} Ярми-ЯхIу 49:36; Даниал 7:2; Закри-ЯхIу 6:5. ^{7:3} Яхъазкхиал 9:4, 6.

- 8 Забулан тІаьхьенах а — шийтта эзар стагана;
Юсупан тІаьхьенах а — шийтта эзар стагана;
Бен-Яманан тІаьхьенах а — шийтта эзар стагана.

Адамийн йоккха тоба

9 Цул тІаьхьа со дІахьаьжча, лаьтташ йолу адамийн йоккха тоба гира суна. Адамаш цхьаьнгге а дагар ца даллал дукха дара. Массо а халкъех, тукхамех, къаьмнех, меттанех схьадевллачу адамийн и тоба яра Делан Іаршана хьалха а, Іахарна хьалха а лаьтташ. Царна тІехь кІайн обанаш а яра, церан карахь хурманийн диттийн гаьннаш а дара. 10 Цара айдинчу озаца бохура: «КІелхьардовлар ду Іаршана тІе хьїна Іаш волчу Делера а, Іахарера а!» 11 Паччахьан гІантана гонах а, къаношна гонах а, деа дийнатна гонах а массо а маликаш дара лаьтташ. Цу Іаршана хьалха бертал а эгна, Далла Іибадат дора цара. 12 «Амин! Хастам а, сийлалла а, хьекъалалла а, баркалла а, ларам а, нуьцкъалалла а, чІагІо а хуьлийла вайн Далла ерриг а тІейогІучу заманна! Амин!» — бохура оцу маликаша.

13 Шен къамел долош, къанойх цхьаммо соьга хаьттира: «И кІайн обанаш тІеюьйхина болу нах муьлш бу? Уьш мичара баьхкина?»

14 Ас цуьнга жоп делира: «Хьуна хьайна ма хаьа, эла».

ТІаккха цо элира соьга: «Уьш, боккхачу балехь а лаьттина, схьабевлла бу. Цара шайн духарш, цІан а дина, Іахаран цІийца кІайдина.

15 Цундела уьш Делан олалин гІантана хьалха лаьтташ бу хІинца.

Цара дийнахьий, буйсанний Делан цІа чохь Далла гІуллакх до.

Іарша тІе охьахїьна Верг цаьрца цхьаьна а Іийр ву,
Цо уьш лар а бийр бу.

16 ХІинца дуьйна уьш меца а хир бац, хьогах а хир бац.

Уьш малхо а, йовхоно а кхин хьийзор бац.

17 ХІунда аьлча и Іарш лаьтгачу меттигна юккъехь болчу Іахаро бажор бу уьш.

Цо уьш дийна хи долчу шовданашка буьгур бу.

Дала Ша дІадохур ду церан бІаьрхиш».

ВорхІалгІа мухІар тептар тІера дІадаккхар

8 1 Іахаро ворхІалгІа мухІар тептар тІера дІадаьккхича, цхьана эха сахьтехь тийна хилла дІахІоьттира стигалахь. 2 Далла хьалха лаьтташ долу ворхІа малик гира суна. Церан кара локхуш йолу ворхІа турба еллера.

3 ТІаккха кхин а цхьа малик деара. Цуьнан карахь хаза хьожа йогІу хІума чуюьллу дашо яй бара. И малик сагІа доккхучу кхерчана хьалха дІахІоьттира. Иштта алссам хьожа йогІу хІума а елира оцу малике. Иза елира, Делан долахь болчу массеран а доІанашца цхьаьна, Делан Іаршана хьалха лаьтташ болчу сагІа доккхучу дашо кхерчана тІе Далла лерина долчу сагІина охьайиллархьама. 4 ТІаккха оцу хьожа йогІучу хІуманых баьлла кІур Делан долахь болчеран доІанашца цхьаьна маликан карара Далла хьалха хьалабахара. 5 Малико и яй, схьа а эгна, дашочу кхерчана тІера йогуш йолчу цІеран кІегийх буьзира. ТІаккха цо уьш лаьтта охьатийсира. Царах гІовгІа а елира, ткьес а туьйхира, стелахаьштигаш а серладийлира, мохк а бегийра.

Дуьххьара локхуш йолу йиь турба

6 Шайн карахь ворхІа турба йолу ворхІа малик турба лакха кечделира.

7 Хьалхарчу малико турба лекхча, цІийх дІайина йолу кьора а, цІе а Лаьтта охьакхиссира, ткьа царах Лаьттан кхоалгІачу декъах цІе елира. Лаьттарчу диттийн кхоалгІа дакъа а, ерриг а сийна буц а егира.

8 ШолгІачу малико а турба лекхира. ТІаккха, богуш болчу ломах тера йолу цхьа йоккха хІума хІорда чу а кхоьссина, хІордийн кхоалгІа дакъа цІий хилла дІахІоьттира. 9 ХІордашна чохь йолчу садолчу хІуманийн кхоалгІа дакъа а хІаллакьхира. Иштта хІаллакьхира хІордкеманийн кхоалгІа дакъа а.

10 КхоалгІачу малико а турба лекхира. ТІаккха стигалара боккха седа охьабуйжира. Иза, хаьштиг санна, кьегаш бара. Хийн а, шовданийн а, хьостанийн а кхоалгІачу декъа тІе охьабуйжира и седа. 11 Цу седанан цІе «сагал-буц» ю. ТІаккха Лаьттан хийн кхоалгІа дакъа, сагал-буц а хилла, кьахьделира. Дукхахдолу адамаш, и кьаьхьа хи мелла дела, делира.

12 ДоьалгІачу малико а турба лекхира. Цул тІаьхьа малхан а, беттан а, седарчийн а кхоалгІа дакъа дІахьулделира. Цундела церан кхоалгІа дакъош кхоьлина дІахІиттира. Дийнан а, буйсанан а кхоалгІа дакъа, серло ца луш а хилла, дІахІоьттира.

13 Со дІахьаьжча, стигална юккъехула тІемаяьлла йоьдуш йолчу цхьана аьрзун айдина аз хезира суна. Цо бохура: «Декъаза хир ду шу, лаьттахь де-хаш долу адамаш, дисинчу кхаа малико локхун йолчу турбанийн аьзнаш шайна хезча!»

7:14 Даниал 12:1; Маттай 24:21; Марк 13:19. 7:16 ЕшаІ-ЯхІу 49:10. 7:17 Забур 22:1; Яхьазкхиал 34:23; Забур 22:2; ЕшаІ-ЯхІу 49:10; ЕшаІ-ЯхІу 25:8.

8:3 Іамос 9:1; Арадаккхар 30:1, 3. 8:5 Іамальяр 16:12; Яхьазкхиал 10:2; Арадаккхар 19:16; Довзийтинарг 11:19; 16:18. 8:7 Арадаккхар 9:23-25; Яхьазкхиал 38:22.

8:10 ЕшаІ-ЯхІу 14:12. 8:11 Ярми-ЯхІу 9:15. 8:12 ЕшаІ-ЯхІу 13:10; Яхьазкхиал 32:7; Юал 2:10, 31; 3:15.

ПховалгIа турба

9 ¹ПховалгIачу малико а лекхира турба. ТIаккха стигалара лаьтта охьа-боьжна седа гира суна. Цу седанан караделира бух боцучу Иинна тIе-боьдучу некъан догIа. ²Бух боцучу Иинна тIебоьдучу некъан догIа цо дIадаьстича, цу некъа тIера, йоккхачу пешана чуьра санна, кIур схьате-сира. Оцу баьллачу кIуьро малх а, хIаваъ а кхолийра. ³ТIаккха лаьтта тIе цу кIуьра юкъара цIоз схьаделира. Лаьттара сту лоцучу гезгийн доллу оалла делира цу цIазана. ⁴Цхъана а бацана, цхъана а ораматна, цхъана а диттана зен ма делаш, элира цу цIазе. Ткъа шайн хьаьжнаш тIе Делан мухIарш тоьхна доцучу адамашна зен дан могуьйту шуна. ⁵ЦIазана тIе-диллира, адамаш дайа а ца дойуш, пхеа баттахь цаьрга хала баланаш хьегийтар. Цара хьобгуьйту баланаш сту лоцучу гезгаша адамашка, шайн юнаш а йиттина, хьобгуьйту баланех тера дара. ⁶Цу деношкахь адамаша шайна Iожалла локхур ю, амма царна и карор яц. Царна делла дIадовла луур ду, амма Iожалла царах йодур ю.

⁷ТIехьаьжча, и цIоз тIамана кечдинчу дойх тера дара. Церан кортош тIехь дашо таьжнаш санна йолу хIуманаш яра. Ткъа церан яххьаш адамийн яххьех тера яра. ⁸Цу цIазан месаш а зударийн месех тера яра. Ткъа церан цергаш локхийн цергаш санна яра. ⁹Цу цIазана тIехь, аьчка долуш санна, гIаьгIнаш дара. Церан тIемийн гIовгIа вуно дукха йолчу, тIаме чехка хахкаелла йоьдучу говрех йоьжначу гIудалкхийн чкъургийн даьллачу доккхачу татанах тера яра. ¹⁰ЦIазан, сту лоцучу гезгийн санна, цIогарчий дара, цIогарчех йохкуш юнаш яра. Пхеа баттахь адамашна зен дан белла ницкъ цу цIазан цIоганашкахь бара. ¹¹Бух боцучу Иинан малик цу цIазан паччахь дара. Iебархойн маттахь цуьнан цIе Абаден-малик яра, ткъа грекийн маттахь Аполлиан яра (иза «хIаллакхуьлуьй-тург» бохург ду).

¹²Цхъа бала дIабаьлла. Ткъа цунна тIаьххье тIебогIуш кхин а ши бала бу.

ЙолхалгIа турба

¹³ЙолхалгIачу малико а лекхира турба. ТIаккха Далла хьалха лаьтташ болчу деших бинчу кхерчан еа маIа чуьра цхъа аз хезира суна. ¹⁴Цо шен карахь турба йолчу йолхалгIачу малике бохура: «Доккхачу Эпрат-хина йистехь дIадихкина долу диъ малик дIахеца!» ¹⁵ТIаккха и диъ малик дIа-хийцира. Адамийн кхоалгIа дакъа хIаллакдан сахьтана а, денна а, баттана а, шарна а кечдина долу маликаш дара уьш. ¹⁶Церан дошлойн эскаркийн долу терахь хезира суна. Иза ши бIе миллионан барамехь дара. ¹⁷Иштта сайна дуьхьалхIоьбтинчу суьртехь суна дой гира, тIехь дошлой а болуш.

^{9:2} Доладалар 19:28. ^{9:3} Арадаккхар 10:12-15. ^{9:4} Яхьазкхиал 9:4. ^{9:6} Аюб 3:21; Яр-ми-ЯхIу 8:3. ^{9:7} Юал 2:4. ^{9:8} Юал 1:6. ^{9:9} Юал 2:5. ^{9:13} Арадаккхар 30:1-3.

Царна тIехь дара цIарула-цIечу а, лилула-сийначу а, можачу саьмгалан а басахь долу гIаьгIнаш. Дойн кортош локхийн коьртех тера дара. Церан багара схьаюьйлура цIе а, кIур а, саьмгал а. ¹⁸Адамийн кхоалгIа дакъа хIаллакхилира хIокху кхаа баланан бахьанина: оцу дойн багара схьа-юьйлуру цIерах а, кIуьрах а, саьмгалх а. ¹⁹Цу говрийн ницкъ церан ба-тошкаххий, цIогарчашкаххий боллура. Церан цIогарчий лаьхьанех тера дара. Цу лаьхьанийн кортош дара, цаьрца зенаш дора цара.

²⁰Ткъа оцу баланех далаза дисина кхидолу адамаш, шайна Ибадат дар-хьама, шайш куьйга йинчу хIуманех дIа ца дирзира. Цара Iамал йора жи-нашна а, деших а, детих а, цIастанах а, тIулгах а, дечигах а бинчу цIушна а, царна хIумма а ца гушшехь а, уьш ца лелалушшехь а. ²¹И адамаш дIа ца дирзира нах байаран а, жиналла лелоран а, сийсаза долу хIума лелоран а, кьоланаш даран а некъа тIера.

Тептар карахь долу малик

10 ¹ТIаккха суна кхин а цхъа нуьцкъала малик гира, стигалара охьа-дуссуш долу. Иза шена тIе марха юьйхина долуш санна дара, цуь-нан коьрта тIехула стелаIад а дара. Юьхь, малх санна, яра. Когаш, цIерах богу бIогIамаш санна, бара. ²Ткъа цуьнан карахь дIаделладелла долу хьарчийна жима тептар дара. Цу малико шен аьтту ког хIорда тIе билли-ра, аьрру ког лаьтта тIе биллира. ³Цо, локмо санна, чIогIа мохь туьйхира. Цо кхайкхинчул тIаьхьа, ворхIе а ткьес туьйхира, церан гIовгIанаша къа-мел а деш. ⁴Цу ворхIе а озо къамел дича, со дIаяздан волавелира, амма цу хенахь суна стигалара аз хезира. Цо соьга бохура: «Оцу ворхIе а ткьесо дийцинарг къайла а даккха, иза дIа а ма язде».

⁵Суна хIордана тIехь а, лаьтта тIехь а лаьтташ гина долчу малико, шен аьтту куьг стигала хьала а кховдийна, ⁶стигал а, латта а, хIорд а, царна чохь мел долу хIума а кхоьल्लीна волчу, ерриг а тIейогIучу заман-на волуш Волчун цIарах чIагIо йира: «Дала кхин лур яц шуна хан. ⁷Вор-хIалгIачу малико турба локхучу хенахь Делан къайлаха йолу Iалашо чекхьер ю, Цо Шен ялхой болчу пайхамаршка хаам бина ма-хилла-ра», — аьлла.

⁸Стигалара суна хезначу цу озо, юха а соьга къамел а деш, элира: «Ваха а гIой, и делладелла долу хьарчийна тептар хIорда тIехь а, лаьтта тIехь а лаьтташ долчу маликан карара схьаэца».

⁹Аса, оцу маликана тIе а вахана, цуьнга дийхира: «Лохьа соьга и теп-тар», — аьлла.

Малико соьга элира: «ДIа а эций, и тептар даа. Хьан кийрахь иза къаь-хьа хир ду, амма хьан багахь, моз санна, мерза хир ду и».

^{9:20} Забур 113:12-15; 134:15-17; Даниал 5:23. ^{10:5-7} Арадаккхар 20:11; Карлабаьк-кхинарг 32:40; Даниал 12:7; Iамос 3:7. ^{10:8-10} Яхьазкхиал 2:8-3:3.

¹⁰Маликан карара тептар схъа а эчна, аса и диира. Моз санна, мерза дара иза сан багахъ. Ткъа аса и тептар диъча, сан кийра къахъбелира. ¹¹Собга элира: «Ахъа юха а Делера болу хаам бан безар бу дуккха а долчу халкъех а, къаьмнех а, меттанех а, паччахъех а лаьцна».

Ши теш

11 ¹Йохалла юстархъама Іасанах тера болу эрз белира сан кара. ТІаккха собга элира: «Хъала а гІаттий, Делан цІа а дуста, сагІа доккху кхерч а буста, цу цІа чуъра Далла Іамал ян догІу адамаш а дагарде. ²Ткъа Делан цІенна арахула йолу керт царна юкъа ма ялае, иза юста а ма юста, хІунда аьлча и кхечу къаьмнашна дІаелла ю. Цара шовзткъе шина баттахъ и еза гІала хьобшур ю. ³Аса Сайн шина тешана олалла лур ду Сайгара болу хаамаш бан. Вон тІедеача тІеюхуш йолу бедарш тІе а юьйхина, цхъа эзар ши бІе кхузткъа дийнахъ Собгара болу хаамаш дІакхайкхор бу цара».

⁴Дерриг а Лаьтта тІехъ олалла Дечунна хьалха лаьтташ долу ши зайт-дйтт а, ши къуьда а бу и ши теш. ⁵Нагахъ цу шина тешана цхьанна зулам дан лаахъ, церан багара араьлладу цІаро мостагІий дІакхоллур бу. Муьлхха а цу шинна зулам дан лиънарг цу тайпана хІаллакван везаш ву. ⁶Цу шиннан карахъ ду, Делера болу хаам шайш дІакхайкхочу деношкахъ лаьтта тІе догІа ца дайтархъама, стигал дІакъовлар. Иштта цу шиннан долахъ ду хиш — церан олаллехъ ду царах цІий дар. Церан бакъо ю, шайна мосазза лии, муьлхха а тайпана долу ун Лаьттахъ дІасадаржо.

⁷Уьш шайн тоьшалла дина чекхбевлча, бух боцучу Іин чуъра хьаладолуш долу экха тасалур ду царах. Цу экхано, толам а баьккхина, и шиъ вуьйр ву. ⁸Церан декъий сийлахъчу гІалин коьртачу урамехъ дуьтур ду. Кица далаш аьлча, цу гІаланах кхин тайпана Седам а, Мисар а олу. Цигахъ церан Веза Эла жІарах дІатоьхна хилла. ⁹ТІаккха кхаа дийнахъий, эха дийнахъий массо а халкъашна а, тайпанашна а, меттанашна а, къаьмнашна а юкъара дукхах долчу адамашна и декъий гур ду. И ши дакъа къубба чу дуьллуьйтур дац. ¹⁰Лаьттахъ дехаш долу адамаш, цу хилла-чух даккхий а деш, самукъадаьлла хир ду. Наха вовшашка совгІаташ а кхийдор ду, оцу шина пайхамаро лаьттахъ дехаш долу адамаш дукха хьийзина хилла дела. ¹¹Ткъа кхо дей, ах дей дІадаьлча, цу шинна чу Делера йолу дахаран Іаь юьйлира. ТІаккха и шиъ шайн когаш тІе хьалахІоьттира. Ткъа цаьрга хьобжуш берш чІогІа кхерабелира. ¹²Шина пайхамарна стигалара чІогІа аз хезира. Цо бохура: «Хьаладовла кхуза!» ТІаккха и шиъ мархица стигала хьалавелира. Ткъа церан мостагІий цаьрга хьобжуш

^{11:1} Яхъазкхиал 40:3; Закри-ЯхІу 2:1, 2. ^{11:2} Лака 21:24. ^{11:4} Закри-ЯхІу 4:3, 11-14.

^{11:6} Сулим 17:1; Арадаккхар 7:17-19; Шамъал 4:8. ^{11:7} Даниал 7:7; Довзийтинарг 13:5-7; 17:8; Даниал 7:21. ^{11:8} ЕшаІ-ЯхІу 1:9, 10. ^{11:11} Яхъазкхиал 37:10. ^{11:12} Сулим 2:11.

бара. ¹³Цу сохъта чІогІа мохк бегийра. ГІалин уьтталгІа дакъа доьхна дІадахара. Мохк бегочу хенахъ ворхІ эзар адам делира. Ткъа бисинчара, чІогІа кхера а белла, стигаларчу Далла хастамаш бира.

¹⁴ТІебеана болу шолгІа бала а дІабелира, амма кестта тІебогІуш кхоалгІа бала а бу.

ВорхІалгІа турба

¹⁵ВорхІалгІачу малико а Шен карара турба лекхира. ТІаккха стигалахъ чІогІа аьзнаш девлира. Цара бохура: «Дерриг а дуьнен тІера пачхьалкх хІинца дуьйна вайн Везачу Элан а, Цо леррина Къобалвинчун а карахъ ю. Цо ерриг а тІейогІучу заманна паччахьалла дийр ду». ¹⁶Далла хьалха долчу паччахьан гІанташна тІе хиъна Іаш волчу ткъе веа къаночо, шайн кортош лаьтта кхаччалц охъа а таІийна, Далла Іибадат дора. ¹⁷Цара бохура:

«Ва массо а ницкъийн Веза Дела,

Хьуна бу хастам, волуш волу а,

хилла волу а Веза Эла,

Ахъа, Хьайн доккха олалла тІе а лаьцна,

паччахьалла дан доладарна.

¹⁸ Къаьмнаш дарделла дІахІиттира,

амма хІинца Хьан оьгІазло а тІеена,

Ахъ беллачарна тІехъ кхел ен хан а тІекхаьчна.

Ахъа Хьайн ялхой болчу пайхамаршна а,

Хьан долахъ болчарна а, Хьо лоруш болчарна а,

лараме боцучарна а, цІеяхана болчарна а

хьакъ дерг дІало хан а тІеена.

Латта хІаллакдеш берш хІаллакбо хан а тІеена!»

¹⁹Стигалшкара Делан цІа дІаделладелира. Цу чохъ Цуьнца бинчу бертан деза тІорказ дара гуш. ТІаккха ткъес а туьйхира, аьзнаш а девлира, стигал а къийкъира, мохк а бегийра, йоккха къора а туьйхира.

Зуда а, саьрмик а

12 ¹Стигалахъ цхъа йоккха билгало дІахІоьттира. Цигахъ малхах дина духар тІехъ долу зуда яра. Цуьнан когаш кІел бутт бара. Ткъа коьрта тІехъ шийтта седа болу таж дара. ²И зуда берах яра. Бер дан хьийзочу лазаршна, цо мохъ хьобкхура.

³Кхин а цхъана билгалонан сурт а хІоьттира стигалахъ. Боккха цІен саьрмик гучубелира. Цуьнан ворхІ корта а бара, итт маІа а яра, хІора коьрта тІехъ таж а дара. ⁴Стигалахъ долчу седарчийн кхоалгІа дакъа, шен

^{11:13} Довзийтинарг 6:12; 16:18. ^{11:15} Арадаккхар 15:18; Даниал 2:44; 7:14, 27.

^{11:18} Забур 2:5; 109:5; Забур 113:21. ^{11:19} Довзийтинарг 8:5; 16:18; Довзийтинарг 16:21.

^{12:3} Даниал 7:7. ^{12:4} Даниал 8:10.

цЮоганца дIа а гулдина, лаьтта охьатеси́ра цо. И саьрмик бер дан дезаш йолчу зудчунна хьалха лаьтташ бара, и бер, дуьнен чу ма-делли, дIакхал-лархьама. ⁵Оцу зудчо кIант ви́ра. Иза аьчка гЮожаца массо а халкьашна тIехь оалла дан билгалваьккхинера. Цеххьана и бер Далла хьалха, Цуьнан Iаршана тIе дIади́гира. ⁶Ткьа и зуда яьссачу аренга дIае́дира. Цигахь, цхьа эзар ши бIе кхузткьа дийнахь цу зудчун дола дайтархьама, Дала цунна меттиг кечийнера.

⁷Стигалахь тIом болабелира. Микаал-малико а, цуьнан маликаша а саьрмикна дуьхьал тIом бира. Ткьа саьрмик а, цуьнан тиладелла маликаш а царна дуьхьалдеви́ра. ⁸Саьрмик а, цуьнан тиладелла маликаш а цу кьовсамехь дуьхьал ца латтаделира. Стигалшкахь кхин меттиг яцара царна. ⁹И боккха саьрмик Лаьтта охьатеси́ра. Иза массарна а бевзаш болу шира лаьхьа бара. Цунах иблис а, Делан мостагIа а олу. Цо дерриг а дуьне Iехадо. Цуьнца цхьаьна цуьнан маликаш а лаьтта охьатийси́ра.

¹⁰ТIаккха стигалахь чIогIа аз хезира суна. Цу озо бохура:

«ХIинца Дала вай кIелхьардахар а, Цуьнан нуьцкьалалла а, паччахьалла а тIекхьачна.

Цо леррина Кьобалвинчун оалалла а тIедеана!

ХIунда аьлча, дийнаххий, буьйсанный вайн Далла хьалха вайн динан вежарий бехке а ийзош, уьш бехкебийриг Лаьтта охьатесна.

¹¹ Вайн динан вежарша Iахаран цIийца а, шайн тоьшаллин дашца а иза эшийна.

Шайш делла дIадовлалц шайн са а ца кхоййна цара.

¹² Иштта, яккхийэлаш стигалш а, стигалш тIехь дехаш дерш а!

Декьаза ду-кх лаьтта тIехь а, хЮорда чохь а дехаш дерш!

ХIунда аьлча, шен йисина хан кIеззиг юйла а хууш, дарделла долу иблис шу долчу лаьтта доьссина!»

¹³Ша лаьтта охьатеснийла а гина, и саьрмик кIант винчу зудчунна тIаьхьабелира. ¹⁴Ткьа зудчунна йоккхачу аьрзун ши тIам белира, яьссачу аренга шена кечийнчу метте иза тIема ялийтархьама. Цигахь, саьрмикна уллора дIа а яьккхина, зама а, замана́ш а, ахзама а чекхьял-лалц, цуьнан дола дийр долуш дара. ¹⁵ТIаккха зудчунна тIаьхьабаьллачу саьрмико шен багара хи туьйхира, цуьнга и зуда дIаяхьийтархьама. ¹⁶Амма Лаьтто гЮо дира цу зудчунна. Саьрмико багара схьатесна долу и хи, дIасадаханчу лаьттан кийрано дIахуьйдира. ¹⁷Саьрмик чIогIа

дарбелира цу зудчунна. Иза цу зудчун тIаьхьенах болчу кхечаьрца тIом бан бахара. Уьш бара, Делан весеташ кхочуш а деш, Iийсах лаьцна долу тоьшалла лардеш берш.

13 ¹ХЮордан гIамар тIехь хЮьттина Iара и саьрмик*.

ХЮорда чуьра схьадаьлла экха

Суна хЮорда чуьра схьадолуш долу цхьа экха гира. Цуьнан ворхI корта а бара, итт маIа а яра. МаIаш тIехь итт таж дара. Цуьнан кортош тIехь Дела сийсазвеш йолу цIераш яра. ²И суна гина долу экха цЮокьбергах тера дара. Цуьнан когаш чен когех тера бара. Ткьа цуьнан бага лобман баганах тера яра. Саьрмико шен ницкь а, шен оалалин меттиг а, доккха оалалла а делира цу экханна. ³ТIаккха суна гира цуьнан кортойх цхьанна йина иза лийр долуш санна йолу Юожалин чов, амма и чов дIайирзира. Дерриг а дуьне, цец а даьлла, цу экханна тIаьхьаделира. ⁴Адамаша цу саьрмикна Iибадат дора, цо шен оалалла цу экханна делла дела. Наха, цу экханна Iибадат а деш, олура: «Кху экхане кхочуш мила ву? Мила ву цуьнца кьовсалур волуш?»

⁵Кура а, Iеса а кьамелаш ден бага елира цу экханна. Шовзткье шина баттахь иштта Iан бакьо елира цунна. ⁶Дела а, Делан цIе а, Дела ве́ха меттиг а, стигалахь бехаш берш а, сийсаз а беш, Iеса кьамелаш дан доли́йра цо. ⁷Цунна бакьо елира Делан нахаца тIом бан а, царна тIехь толам баккха а. Иштта массо а тайпанашна а, халкьашна а, меттанашна а, кьаьм-нашна а тIехь оалалла дан бакьо елира цунна. ⁸Бийначу Iахаран карахь долчу дахаран тептар тIе шайн цIераш дуьне кхуллуш дуьйна а дIаяздина доцу массо а адамаш цу экханна Iамал еш хир ду.

⁹Лергаш долчо ладугIийла хЮокхуьнга.

¹⁰ Адамна йийсар динарг ша а вуьгур ву йийсаре.

Туьраца стаг вийнарг

ша а лийр ву туьрах.

Цу тIехь оьшу Делан долахь болчарна доьналла а, тешар а.

Лаьттан кийрара схьадолу экха

¹¹Иштта суна гира лаьттан кийрара схьадолу кхин а цхьа экха. Цуьнан, Iахаран санна, ши маIа яра. Цо, саьрмико санна, кьамел дора. ¹²Хьалхарчу

* ^{13:1} И саьрмик. Цхьадолчу тептарш тIехь ду: со. Цу тайпана хIара предложени шолгIачу предложеница йобзна яра.

^{12:5} ЕшаI-ЯхIу 66:7; Забур 2:9. ^{12:7} Даниал 10:13, 21; 12:1; Довзийтинарг 1:9.

^{12:9} Доладалар 3:1; Лака 10:18. ^{12:10} Аюб 1:9-11; Закри-ЯхIу 3:1. ^{12:14} Даниал 7:25; 12:7.

^{13:1} Даниал 7:3; Довзийтинарг 17:3, 7-12. ^{13:2} Даниал 7:4-6. ^{13:5,6} Даниал 7:8, 25; 11:36. ^{13:7} Даниал 7:21. ^{13:8} Забур 68:29. ^{13:10} Ярми-ЯхIу 15:2; 43:11.

эханна хьалха ша долчу хенахь, цу экханан ерриге а бакьонаш лелайора цо. Цу шолгIачу экхано дерриг а Лаьтте а, цу тIехь дехачу адамашка, а Южаллин чов а хилла, амма тоделлачу хьалхарчу экханна Ибадат дайтира. ¹³Цо инзаре тамашийна билгалонаш гайтира. Ур-атталла стигалара лаьтта тIе цIе а охьайоуьйтура цо адамашна хьалха. ¹⁴ШолгIачу экхано вукху экханна хьалха Iаламаташ лело бакьо елира. Уьш лелорца цо лаьттахь деха адамаш Iехадора. Лаьттахь бехаш болчу массарна а цо тIедуьлтура, туьрах Южаллин чов а хилла, амма денделлачу хьалхарчу экханан дина сурт шайна тIедиллийтар. ¹⁵ШолгIачу экханна бакьо елира цу хьалхарчу экханан суьрта чу са дилла а, кьамел дайтархьама а, хIора оцу экханан суьртана хьалха Ибадат цадийриг вен бакьо хилийтархьама а. ¹⁶ШолгIачу экхано массо а адамийн — лараме воцчун а, цIеяханчун а, хьалдолчун а, мискачун а, паргIат волчун а, лай волчун а — аьтту куьйга тIе я хьаьжа тIе мухIар таIор тIедиллира. ¹⁷Цу экханан мухIар таIийна воцучу цхьаннан а йиш ца хилла хIумма а я эца а, я йохка а. Ткьа оцу мухIар тIехь цу экханан цIе я цуьнан цIеран терахь дара.

¹⁸Цу тIехь хьекьалалла оьшу. Хьекьал шен долчо цу экханан терахь, талла а теллина, билгалдаккха. ХIунда аьлча иза адамийн терахьца догIуш ду. Цуьнан терахь ду ялх бIе кхуэзткье ялх.

Иахар а, Цуьнан халкь а

14 ¹Со дIахьаьжча, суна Цийон-лам тIехь лаьтташ болу и Иахар гира. Цуьнца цхьаьна лаьтташ цхьа бIе шовзткье виь эзар стаг вара. Церан хьаьжнашна тIехь Цуьнан цIе а, Цуьнан Ден цIе а дIаязйина яра. ²Суна стигалара аз хезира. Цуьнан гIовгIа чухчарин гIовгIанах а, чIогIа кьекьачу стигалан гIовгIанах а тера яра. Шайн дечиг-пондаршна тIехь эшарш локьхучу пондарчийн аз а хезира суна. ³Цу нехан тобано стигаларчу Iаршана а, деа дийнатна а, кьаношна а хьалха керла йиш локьхура. Ткьа лаьттара, мах а белла, кIелхьарваьккхинчу, цхьа бIе шовзткье виь эзар стаге бен, кхин цхьаьнгте а и йиш ца Iамалора. ⁴Уьш, зудчух куьг тохаза, кIантстегарий бара. Уьш бара, Иахар стенгга бодахь а, Иза воьдлучу дIабоьлхуш берш. Мах а белла, адамашна юкьара паргIатбаьхна бара уьш, Далла а, Иахарна а ялтин хьалхара стоьмаш санна дIабалархьама. ⁵Церан багара цхьа а харцдерг ца долура, уьш бехк буьллийла доцуш бара.

Кхо малик

⁶ТIаккха суна стигална юккьехула тIемадаьлла доьду кхин а цхьа малик гира. Цуьнгахь даим болу хаза кхаь бара, иза Лаьттахь бехаш болчу массарна а байитина бара, хIора кьомана а, тайпанна а, маттана а, халкьана а дIакхайкхорхьама. ⁷Цу малико, мохь туххуш, бохура: «Делах

кхералаш! Цунна хастамаш белаш! ХIунда аьлча Цо кхел ен хан тIе-кхаьчна. Стигал а, латта а, хIорд а, хин хьостанаш а Кхоьллингчунна Iа-мал елаш».

⁸Кхин а цхьа малик цуьнан лорах дIадахара. Цо бохура: «Ма хIаллакь-хили иза! ХIаллак а хилла, дIаели йоккха Бавел-гIала. Ша сийсаза леларна, Дела дарвеш волу чагIар малийна цо массо а халкьашна».

⁹КхоалгIа малик а дахара церан лорах. Цо, мохь туххуш, бохура: «Нагахь цхьаммо оцу экханна я цуьнан суьртана Ибадат а дахь, я шен хьаьжа тIе, я шен куьйга тIе цу экханан мухIар а таIадайтхь», ¹⁰Делан оьгIазло-нан кеда чу, э а ца деш, доьттина долу Делан дераллин чагIар мер ду цо. Иштта волу стаг Делан маликашна а, Иахарна а хьалха цIергахь а, саьмгал чохь а хьийзор ву. ¹¹Уьш хьийзош йолчу цIеран кIур массо а заманахь хьалаоьхур бу. Цу тайпана я дийнахь, я буьйсанна синтем хир бац, оцу экханна а, цуьнан суьртана а Ибадат а деш, цуьнан цIеран мухIар тIеэц-начийн».

¹²Кхузахь, Делан хьехамаш лар а беш, Иийсана тешаме дуьсуш долчу Делан адамашна доьналла долуш хилар оьшу.

¹³ТIаккха суна стигалара аз хезира. Цо соьга бохура: «ДIаязде: „ХIин-ца дуьйна декьал бу, Везачу Элах тешар а долуш, леш берш“».

«БилгIал бакь ма ду, — боху Делан Сино, — Шаьш дечу гIуллакхех са-доIур ду цара. Церан гIуллакхаш а царна тIаьххье дIагIур ду».

Лаьттахь ялта хьокху хан тIеяр

¹⁴Со дIахьаьжча, суна кIайн марха гира. Цу мархина тIехь «адамийн кIантах тера волу цхьаь» вара охьахиьна. Цуьнан коьрта тIехь деших дина таж дара. Ткьа карахь ира марс бара. ¹⁵Делан цIа чуьра кхин а цхьа малик араделира. Цо мархина тIе охьахиьна волчуьнга айдинчу озаца, мохь туххуш, элира: «Хьайн марс схьа а эций, ялта хьакха! ХIунда аьлча лаьттахь ялта кхиьна а даьлла, марс хьокху хан тIе а кхаьчна».

¹⁶ТIаккха стигаларчу мархина тIехиьна волчо, лаьттана тIехула шен марс хьала а айина, лаьттара ялта хьаькхира.

¹⁷Стигалахь долчу Делан цIа чуьра кхин а цхьа малик араделира. Цуьнгахь а ира марс бара.

¹⁸Ткьа сагIа доккхучу кхерчана уллора цIарна тIехь олалла деш долу кхин а цхьа малик тIедеара. Цо куьйгахь ира марс болчуьнга айдинчу оза-ца, мохь туххуш, элира: «Хьайн ира марс схьа а эций, лаьттарчу кемсийн таьллангашна тIера кемсийн хорханаш схьаяха, хIунда аьлча и кемсаш хилла яьлла». ¹⁹ТIаккха малико шен ира марс лаьтта тIехула хьалаайира.

^{14:8} ЕшаI-ЯхIу 21:9; Ярми-ЯхIу 51:8; Довзийтинарг 18:2. ^{14:10} ЕшаI-ЯхIу 51:17; Доладалар 19:24; Яхьазкхиал 38:22. ^{14:11} ЕшаI-ЯхIу 34:10. ^{14:14} Даниал 7:13.

^{14:15} Юал 3:13.

^{14:1} Яхьазкхиал 9:4; Довзийтинарг 7:3. ^{14:5} Цапни-ЯхIу 3:13.

Лаьтгара кемсаш, хеда а йина, Делан дераллин муттдоккхургана чу теси-
ра цо. ²⁰ Галина арахьа лаьтгачу муттдоккхурга чохь и кемсаш Iaьвдира.
Тпаккха цу чуьра ций охьадахара, говрийн дуьрстанашна тIе кхачалц
хьала а долуш. Иза кхо бIе чаккхарма¹ хиллал гонах дIасадаьржира.

Шайгахь тIаьхьара ворхI бала болу маликаш

15 ¹Тпаккха стигалахь кхин а цхьа тамашийна билгало гира суна. Иза
йоккха а, инзаре а яра. Шайгахь тIаьхьара бисина ворхI бала болу
ворхI малик а дара цигахь. Уьш тIаьхьара баланаьш бара, хIунда аьлча
цаьрца чекхийолура Делан дералла.

²Тпаккха цIерах дIаййна долчу ангалин болуш санна, хIорд гира суна.
Ткьа оцу экханна а, цуьнан суьртана а тIехь — шен цIеран терахь долчу
цхьанна тIехь — толам баьккхинарш цу ангалин хIордана йистехь лаьт-
таш бара. Церан карахь Дала делла мерз-пондарш дара. ³Цара Далла
гIуллакх деш хиллачу Муса-пайхамаран а, Iахаран а илли олура:

«Даккхий а, инзаре а ду Хьан гIуллакхаш,
массо а ницкхийн Веза Дела!

Нийса а, билггал бакъ а ду Хьан некъаш,
дуьненан кьаьмнийн Паччахь!»

⁴ Мила кхоьрур вацара Хьох, ва Веза Эла?
Хьан цIе а хьан язийир яцара?
ХIунда аьлча Хьо цхьаь ву веза!

Массо а халкъаша, тIе а даьхкина,
Хьуна хьалха Ибадат дийр ду.
ХIунда аьлча Ахь нийсонца лелош долу гIуллакхаш
тхуна гучу ма девлла».

⁵Цул тIаьхьа со дIахьаьжира. Тпаккха стигалахь долчу тоьшаллин Че-
таран уггар а еза чоь дIаеллаелира. ⁶Цу чоьнна чуьра, тIаьхьара хир болу
ворхI бала а бахьаш, ворхI малик араделира. Царна тIехь яра дуткьачу
кIадих йина цIена а, кьегаш йолу а бедарш. Некхана гонах дашо доьх-
карш а дара. ⁷Цул тIаьхьа деа дийнатах цхьаммо оцу маликийн кара ворхI
дашо бога делира. Ерриг а тIейогIучу заманна а вехаш волчу Делан дерал-
лех дуьзна дара и боганаьш. ⁸Тпаккха Делан сийлаллин а, нуьцкьалаллин
а кIуьрах дуьзира и Делан цIа. Ткьа оцу ворхI малико беана ворхI бала
дIабаллалц, цхьанна а стеган цу цIа чу ваха йиш яцара.

* ^{15:3} Дуьненан кьаьмнийн паччахь. Цхьадолчу тептарш тIехь: заманийн паччахь.

^{14:20} ЕшаI-ЯхIу 63:3; Тийжамаш 1:15; Довзийтинарг 19:15. ^{15:3} Арадаккхар 15:1.

^{15:4} Ярми-ЯхIу 10:7; Забур 85:9. ^{15:5} Арадаккхар 38:21. ^{15:8} Арадаккхар 40:34; Сулим
8:10, 11; 2 Шерашкахь 5:13, 14; ЕшаI-ЯхIу 6:4.

Делан дераллин боганаьш

16 ¹Суна Делан цIа чуьра аз хезира. Цо ворхI малике бохура: «ГIой,
Делан оьгIазлонан ворхIе а боган чохь дерг лаьтта тIе охьадотта».

²Хьалхарчу малико, дахана, шен боган чохь дерг лаьтта тIе охьадоьт-
тира. Тпаккха шайна тIехь экханан мухIар а долуш, цуьнан суьртана И-
бадат деш долчу адаманна тIехь чIогIа дера а, ирча а ноткъа оьху даьIнаш
даьржира.

³ШолгIачу малико шен боган чохь дерг хIорда чу охьадоьттира. Тпак-
кха хIорд, деллачу адамийн цIийх а тарлуш, цIий хилла дIахIоьттира.
Ткьа хIорда чуьра массо а дийна мел долу хIума делира.

⁴КхоалгIачу малико шен боган чохь дерг хиш чу а, хин хьостанаьш чу а
охьадоьттира. Царах цIий хилира. ⁵Тпаккха хиш карахь долчу малико
олуш суна хезира:

«Нийса ву Хьо волуш волу а, хилла волу а Везаниг,
Ахь йина кхелаш иштта хиларна.

⁶ Хьан долахь болчеран а, Хьан пайхамарийн а цу наха цIий Iанорна,
Ахь цаьрга цIий малийти.
Царна и дан хьакъ а ду».

⁷СагIа доккхучу кхерчана уллора а аз хезира суна. Цо бохура:
«ХIаь, массо а ницкхийн Веза Дела,
билггал бакъ а, нийса а ю Хьан кхелаш».

⁸ДобалгIачу малико шен боган чохь дерг малхана тIе охьадоьттира.
Ткьа малхан караделира адаманна цIергахь марцар. ⁹Нуьцкьалчу йовхоно
адаманна дагадора. Ткьа и баланаьш тIебахкийта бакъо йолуш волчу Делан
цIе емалйора цара. Шайн кьинойх дIа а ца кьаьстира уьш, Далла хаста-
маш а ца бира цара.

¹⁰ПхоьалгIачу малико шен бога экханан олаллин гIанта тIе охьаIа-
нийра. Тпаккха церан пачхьалкх, Iаьржа бода а хIоьттина, кхоьлира. Ада-
маша, лазаршна са ца тохадаларна, шайн меттанаш Iуьйшура. ¹¹Шайн
лазарш а, даьIнаш долу чевнаш а бахьанехь адаманна стигаларчу Далла
сардамаш доьхура. Амма шаьш лелийначу гIуллакхех дIа ца боьрзура уьш.

¹²ЙолхалгIачу малико шен бога Эпрат цIе йолчу доккхачу хи чу охьа-
доьттира. Тпаккха, малхбалехьарчу паччахьашна некъ кечбархьама, и хи
лекъира. ¹³Тпаккха суна гира саьрмикан багара а, экханан багара а, харц-
пайхамаран багара а арадолу, беан пхьидех тера долу кхо харц жин.
¹⁴Уьш жинийн синош дара. Цара тамашийна хIуманаш дора. И жинаш
дерриг а дуьнен чуьра паччахьашна тIе дахара, массо а ницкхийн Делан
сийлахьчу дийнахь уьш тIае схьагулбархьама.

^{16:2} Арадаккхар 9:10. ^{16:4} Арадаккхар 7:17-21; Забур 77:44. ^{16:10} Арадаккхар 10:21.

^{16:12} ЕшаI-ЯхIу 11:15.

¹⁵ «ЛадогІалаш! Со, кѹ санна, цѣххѣана вогІур ву. Декѣала бу, шаьш берзина ца хилийтархѣама а, шайн бехке меттигаш гучу ца яхархѣама а, тѣюху бедарш кѹйга кІел а латтош, сема берш».

¹⁶ Иштта, и паччахьаш Іебархойн маттахь ХІар-Магдон олучу метте дІагулбира оцу жинаша.

¹⁷ ВорхІалгІачу малико шен боганна чѹьрниг хІаваэ охѣадоьттира. ТІаккха стигалшкарчу Делан цІа чѹьра Іаршана тІера чІогІа аз хезира. Цо элира: «Кхочушхили!» ¹⁸ ТІаккха ткѣс туьйхира, стигал кѹйкѣира, гІов-гІанаш евлира, чІогІа мохк бегийра. Адамаш лаьттаьх дѣхаш долчу хенахь дуьйна, цкѣа а ца хиллачу кепара чІогІа мохк бегийра. ¹⁹ Йоккха гІала кхаа декѣе екѣелира. Ткѣа кхечу кѣамнийн гІаланаш хІаллакѣхилира. Йоккха Бавел-гІала Шена дагахь йолу дела, Дала таІзар дира цунна. Дала Шен кеда чѹьра Шен оьгІазечу дераллин чагІар дІамалийтира цуьнга. ²⁰ ХІора гІайре а дІаелира, ткѣа лаьмнех кхин хІумма а ца дисира. ²¹ Стигалара охѣа адаманна тІе хІора буьртиг ши мазал¹ хир йолу кѣора туьйхира. ТІаккха адаманна оцу кѣорано хІоттийна бала бахѣана долуш Далла сардамаш доьхкира, хІунда аьлча и бала инзаре боккха бара.

ЧІогІа сийсаза лела зуда

17 ¹ ТІаккха шайн карахь ворхІ бога долчу ворхІ маликах цхѣаь суна тІедеара. Цо соьга элира: «ТІехилал! Ас хѹна гоьтур ду, дуккха а долчу хишна тІе а хиѣна, чІогІа сийсаза лелаш йолчунна дийр долу таІзар. ² Лаьттара паччахьаш а сийсаза лелара цуьнца цхѣаьна. Лаьттаьх бехарш а, цуьнан сийсаза леларан чагІар а муьйлунш, бѣхаш бара».

³ Делан Са суна тІе доьссича, цу малико со яьссачу аренга вигира. Цигахь суна зуда гира. Иза цІечу экханна тІехиѣна яра. Цу экханна тІехь массанхѣа а Дела сийсазевш йолу цІераш а яра, цуьнан ворхІ корта а, итт маІа а яра. ⁴ Зудчунна тІехь таьІна цІечу басахь а, цІарула-цІечу басахь а духар дара. Дѣших йина хІуманаш, деза тІулгаш, жовхІарш дара цунна тІехь. Цуьнан карахь дашо кад бара. И кад вас еш долчу гІуллакхех а, нахаца леларан боьхачу гІуллакхех а буьзна бара. ⁵ Зудчун хѣаьжа тІе язѣина кѣайлаха маьІна долу цІе яра: «Йоккха Бавел-гІала сийсаза лелачеран а, лаьттарчу вас еш долчу гІуллакхийн а нана ю», — аьлла. ⁶ ТІаккха суна гира Делан долахь болчеран а, Гийсана тѣшама хилар бахѣанехь байинчеран а цІийно и зуда яхийна хилар.

Иза гича, со чІогІа инзарваьллера. ⁷ Малико соьга элира: «Хѹ инзар хІунда вуьйлу? Оцу зудчун а, иза шена тІехь лелош долчу ворхІ корта а, итт

маІа а йолчу экханан а кѣайле юьйцур ю ас хѹна. ⁸ Хѹна гина долу и экха цкѣа мацах дийна дара, ткѣа хІинца делла. Амма иза кхин цкѣа а, бух боцу-чу Ин чѹьра хѣала а даьлла, шен хІаллакѣхиларна тІе догІур ду. ТІаккха, хІара дуьне кхуллуш дуьйна а шайн цІераш дахаран тептар тІе дІаязѣина а йоцуш, лаьттаьх бехарш, и экха шайна гича, цецбевр бу. ХІунда аьлча иза цкѣа дийна а хилла, тІаккха делла, амма юха, ден а делла, схѣадогІур ду.

⁹ Кхузахь хѣекѣалх буьзна кхетам оьшу. ВорхІ корта — иза зуда тІехиѣна болу ворхІ гу бу. ¹⁰ Иштта уьш ворхІ паччахь ву бохург а ду. Царах пхиѣ велла. Цхѣаь хІинца а дийна ву. Ткѣа тІаьххѣарниг хІинца а схѣаваза ву. Иза схѣавѣача, кІезигчу хенахь бен паччахьалла дан ца деза цуьнан. ¹¹ Ткѣа мацах дийна а хилла, хІинца делла долу экха — иза оцу ворхІаннах цхѣаь волу борхІалгІа паччахь ву. Иза шен хІаллакѣхиларна тІе догІур ву.

¹² Хѹна гуш йолу итт маІа — уьш хІинца а олалла дан волавалаза волу итт паччахь ву. Царна хІоранна а цхѣаца сахѣтѣхь экханца цхѣаьна, паччахьо санна, олалла дан бакѣо лур ю. ¹³ Оцу итте а паччахьан цхѣатерра Іалашонаш хир ю. Цара шайн ницкѣ а, олалла а экханна дІалур ду. ¹⁴ Цара Іахарца тІом бийр бу. Ткѣа Іахаро царна тІехь толам боккхур бу, хІунда аьлча Иза ву олахойн Олахо а, паччахьийн Паччахь а. Ткѣа Цуьнца берш бу Цо кхайкхинарш а, кѣастийнарш а, тѣшама берш а».

¹⁵ Малико соьга элира: «Шена тІехь и нахаца лелаш ерг а йолуш, хѹна гина долу и хиш — уьш халкѣаш а, тобанаш а, кѣамнаш а, меттанаш а бохург ду. ¹⁶ Хѹна гиначу итте а маІана а, экханна а Ёаьрга ян а езар яц и нахаца леларг. Цуьнан долахь мел дерг схѣа а даьккхина, цара иза ерзина йоккхур ю. Цара цуьнан дегІ а дуур ду, и цІергахь ягор а ю. ¹⁷ ХІунда аьлча Дала оцу итт маІан даг чу Шен Іалашо кхочушѣяр чудиллина. Иштта цара вовшашца барт бийр бу шайн паччахьалла экханан дола дІадала. Иза иштта хир ду, Делан дешнаш кхочушхилалц.

¹⁸ Ткѣа хѹна гина йолу зуда — иза лаьттарчу паччахьашна тІехь олалла деш йолу йоккха гІала ю».

Бавел-гІалин хІаллакѣхилар

18 ¹ Цул тІаьхѣа суна гира стигалара охѣадогІу кхин а цхѣа малик. Цуьнан долахь доккха олалла дара. Оцу маликан нуьро латта кѣагийра. ² Цо айдинчу озаца, мохь тоьхна, элира: «Ма хІаллакѣхили иза! ХІаллак а хилла, дІаели-кх йоккха Бавел-гІала. Жинашна Іан меттиг а, муьлххачу а харц жинна дІалачкѣа меттиг а хили цунах. Муьлххачу а хѣарамчу олхазаран бен а, муьлххачу а хѣарамчу а, маьттазчу а экханан бен а хили цунах. ³ ХІунда аьлча ша сийсаза леларна, Дела дарвеш долу чагІар

^{16:15} Маттай 24:43, 44; Лака 12:39, 40; Довзийтинарг 3:3. ^{16:16} Сулим 23:29; Закри-ЯхІу 12:11. ^{16:18} Довзийтинарг 8:5; 11:13, 19. ^{16:19} ЕшаІ-ЯхІу 51:17. ^{16:20} Довзийтинарг 6:14. ^{16:21} Арадаккхар 9:23; Довзийтинарг 11:19. ^{17:1} Ярми-ЯхІу 51:13.

^{17:2} ЕшаІ-ЯхІу 23:17; Ярми-ЯхІу 51:7. ^{17:3} Довзийтинарг 13:1. ^{17:4} Ярми-ЯхІу 51:7.

^{17:8} Даниал 7:7; Довзийтинарг 11:7; Забур 68:29. ^{17:12} Даниал 7:24. ^{18:2} ЕшаІ-ЯхІу 21:9; Ярми-ЯхІу 51:8; Довзийтинарг 14:8; ЕшаІ-ЯхІу 13:21; Ярми-ЯхІу 50:39.

^{18:3} ЕшаІ-ЯхІу 23:17; Ярми-ЯхІу 51:7.

малийна цо массо а халкъашна. Дуьнен чуьра паччахьаш а сийсазбевли цуьнца цхьаьна. Иштта дуьнен чуьра совдегарш а хьал долуш хилла дIа-хIиттира, цуьнан сов баккий боьха лаамаш бахьана долуш».

⁴ТIаккха стигалара кхечу цхьана озо олуш хезира суна:

«Сан халкъ, арадала оцу гIали чуьра,
цигахь кьинош леточарна юкьахь дакъалоцуш хьо ца
хилийта,
хьуна хьайна а, царна санна, цамгарийн ун ца
кхетийтархьама.

⁵ Цуьнан кьинош стигала хьалакхаччал ду.

Ткъа цуьнан харцонаш Далла дагахь ю.

⁶ Цо кхечарна динчу гIуллакхашка хьажжий, дIадекхалаш цунна!

Цо шайна динчунна дуьхьал шозза а дIадекхалаш цунна.

Цо шайна чагIар кечдинчу кедахь

цул шозза дукха чагIар кечде аша цунна.

⁷ Хьолана юкъа а яхана, шен сийлалла хьала а даьккхина, иза

Ийна хиларе терра,

аша а оццул баланехь а, гIайгIанехь а хилийта иза.

ХIунда аьлча цо шен дагахь боху: „Со паччахь хилла Iаш ю.

Со йисина Iаш ерг яц.

Со цкъа а хир яц гIайгIане!“

⁸ Цундела цхьана дийнахь богIур бу цунна тIе цуьнан баланах:

ялар а, гIайгIане хилар а, мацалла а.

И гIала цIергахь йогур ю,

хIунда аьлча ницкъ болуш ву цунна кхел йо Веза Дела».

⁹ТIаккха, и гIала йогуш, цунах хьалабаьлла кIур шайна гича, цу гIалахь сийсаза лелла болу а, хьал лакхадаьлла болу а дуьнен чуьра паччахьаш, цунна тийжа а тийжаш, боьлхур бу. ¹⁰Цу гIалина тIедеанчу Iазапна, даг чу кхерамаш а тесна, генна дIа а хIиттина, цара эр ду:

«Къа ду хьан, йоккха гIала!

Къа ду нуьцкъалчу Бавел-гIалин!

ХIунда аьлча нийсса цхьана сахьтхь

хьуна кхел йина-кх!»

¹¹Оцу гIалина хилларг бахьанехь боьлхуш а, гIайгIанехь а хир бу дер-риг а дуьнен чуьра совдегарш а. ХIунда аьлча церан юккуш йолу хIуманаш хIинца цхьаммо а оьцуш яц. ¹²Уьш яра дашо а, дато а хIуманаш а, деза тIулгаш а, жовхIарш а, дуткъачу кIадих йина хIуманаш а, таьIна-цIен долу кIадеш а, дареш а, цIарула-цIен бос болу кIадеш а. Иштта духкуш

^{18:4} ЕшаI-ЯхIу 48:20; Ярми-ЯхIу 50:8; 51:6, 45. ^{18:5} Доладалар 18:20, 21; Ярми-ЯхIу 51:9. ^{18:6} Забур 136:8; Ярми-ЯхIу 50:29. ^{18:7}, ⁸ ЕшаI-ЯхIу 47:7-9. ^{18:9}, ¹⁰ Яхьазкхиал 26:16, 17. ^{18:11} Яхьазкхиал 27:31, 36. ^{18:12}, ¹³ Яхьазкхиал 27:12, 13, 22.

дара цара массо а тайпана хаза хьожа йогIу дечиг а, пийлан маIех йина йолу тайп-тайпана хIуманаш а, уггар а дезачу дечигах йина йолу массо а тайпана хIуманаш а, цIаста а, эчиг а, шагатIулг а, ¹³хаза хьожа йогIу даьт-та а, хаза хьожа йогIу кIур хьалабохуьйтург а, деза хьакхарш а, чагIар а, зайтдаьтта а, дама а, ялта а, бежанаш а, уьстагIий а, дой а, гIудалкхаш а. Иштта леш а, йийсар динарш а бара цара бухкуш. ¹⁴Цара эр ду: «Хьайн дола яха хьо хьегна мехала хIуманаш ерриш а хьан долара дIаевлла. Дер-риге а сийлалла а, возалла а дайна, йиси хьо. Уьш кхин хир дац хьан». ¹⁵И массо а хIуманаш а юккуш, мах лелош хилла болу, цунах хьал лакхадаьл-ла совдегарш, цуьнан баланех кхера а белла, гено дIахIуьттур бу. Боьлхуш а, гIайгIанехь а болуш, ¹⁶цара эр ду:

«Къа ду хьан, ва йоккха гIала!

Дуткъачу а, таьIна-цIечу а, цIарула-цIечу а

кIадийн бедарш тIеюьйхира ахь.

Дешин хIуманашца а, дезачу тIулгашца а,

жовхIаршца а

кеййора хьо.

¹⁷ Цхьана сахьтхь хIаллакьхили-кх оццул дукха хилла долу хьал!»

Массо а хIордкеманаш долахь берш а, хIордкеманашна тIехь болу не-кьахой а, кемалелорхой а, берриг а хIордаца доьзна йохкаэцар лелош берш а генна дIахIиттира. ¹⁸Цара, йогучу гIалин цIерах хьалаболу кIур а гина, элира: «Муьлха гIала яра те цу йоккхачу гIаланах тера?!» ¹⁹ТIаккха шайн кортош тIе ченаш тийсира цара. ГIайгIане а эгна, белха а боьлхуш, цара, мохь а бетташ, бохура:

«Къа ду хьан, ва йоккха гIала!

ХIордана тIехь долу массо а хIордкеманаш шайн долахь

долчара

оцу гIалин деза а, мехала а мел долчу хIуманах шайн хьал

совдаьккхира.

Ткъа хIинца-м иза цхьана сахьтхь йоьхна дIахIоьтти».

²⁰Яккхийэлаш шу, стигалш! Даккхийделаш шу, Делан долахь дерш а, векалш а, пайхамарш а! ХIунда аьлча Дала кхел йина цунна, цо шуна мел дина вон бахьанехь.

²¹Цхьана нуьцкъалчу малико, хьеран боккхачу тIулгах тера болу тIулг схьа а эцна, хIорда чу кхоьссира. Цо элира:

«Ишттачу ницкъаца хIаллакыййр ю

сел йоккха йолу Бавел-гIала,

иза кхин юха хир а йоцуш!

^{18:15} Яхьазкхиал 27:31, 36. ^{18:17} ЕшаI-ЯхIу 23:14; Яхьазкхиал 27:26-30. ^{18:18} Яхьаз-кхиал 27:32. ^{18:19} Яхьазкхиал 27:30-34. ^{18:20} Карлабаьккхиарг 32:43; Ярми-ЯхIу 51:48. ^{18:21} Ярми-ЯхIу 51:63, 64; Яхьазкхиал 26:21.

- ²² Кхин цкъа а хезар дац хъуна чохъ
мерз-пондар локхучеран а, иллеш олучеран а аьзнаш,
шедагаш а, маIаш а локхучеран а аьзнаш.
Цхъана а тайпана пхъераш кхин хир бац хъуна чохъ.
Болх беш хыйзаш йолчу кохъаран гIовгIа а хезар яц
хъуна чохъ.
- ²³ Къуьднанан серло а кхин хир яц хъуна чохъ.
Кхин цкъа а хезар дац хъуна чохъ нускалийн а,
уьш балош болчеран а аьзнаш.
Хъан совдегарш бара кху дуьненахъ уггар а хьалдерш.
Хъуна чохъ болчу бозбунчаша Iехийнера массо а халкъаш».
- ²⁴ Кху гIалахъ карийнера байинчу пайхамарийн а, Делан нехан а, массо
а кху лаьттахъ байинчеран а цIий!

- 19** ¹Цул гIаьхъа, йоккхачу тобано олуш санна, стигалара чIогIа аз хе-
зира суна. Цо бохура:
«Далла бу хастам!»
Вайн Делехъ ду кIелхъардовлар а, сийлалла а, нуьцкъалалла а.
- ² Цуьнан кхелаш билггал бакъ а,
нийсо йолуш а ю.
Цо кхел йира оцу чIогIа сийсаза лелаш йолчунна, оцу йоккхачу
гIалина.
Цо шен сийсаза леларца дуьне а бехдинера.
Цо Делан ялхой болчеран цIий Iанорна,
Дала цунна догIуш долу таIзар дира».
- ³ ШозлагIа а олуш хезира суна:
«Хастам бу Далла!
Ерриг а тIейогIучу заманна а хир бу цу гIалина тIехула
хьалатуьйсуш кIур».
- ⁴ TIаккха ткъе виь къано а, диь дийнат а Iаршана тIехиъна Iаш волчу
Далла хьалха суждане дахара. Цара бохура: «Амин! Хастам бу Далла!»

Иахаро зуда ялор

- ⁵ TIаккха оцу Iаршара схьадолу кхин а аз хезира. Цо бохура:
«Хастамаш бе вайн Далла
массо а Цуьнан ялхой болчара а,

* ^{19:1} Далла бу хастам. Ма-дарра аьлча, яздархочо кхузахъ а, дерриге а 19-чу коьр-
тахъ а Iебархойн маттера долу дош леладо: *ХIалала-ЯхIу*.

- Цунах кхоьруш болчу
лараме боцучара а, цIеяханчара а».
- ⁶ Суна хезира йоккхачу тобанна чуьра долуш санна долу аз а. Чухчарин
гIовгIанах я чIогIачу стигалан къекъарх тера дара и аз. Цо бохура:
«Хастам бу Далла!
XIунда аьлча массо а ницкъийн Веза Дела
паччахьалла дан волавелла.
- ⁷ Даккхийдерца, самукъадаьлла хир ду вай.
Далла хастамаш беш, Цуьнан сийлалла ойур ю вай.
XIунда аьлча Iахаро зуда яло хан тIекхьачна,
ткъа Цо ялош ерг кечъелла.
- ⁸ Цо цIена а, лепаш долчу а дуткъачу кIадинан коч тIеюьйхина».
(Ткъа и дуткъа кIади — Делан долахъ болчара Цуьнан лаамехъ дина до-
лу гIуллакхаш бохург ду.)
⁹ Малико соьга элира: «ДIаязде: „Декъала бу Iахаро зуда ялорна дIа-
хIоттийначу тойне кхайкхинарш“». Кхин а цо элира: «XIорш билггал
бакъдолу Делан дешнаш ду».
- ¹⁰ Со цуьнан когашка вуьйжира, цунна хьалха Iибадат дан дагахъ, амма
малико соьга элира: «Варелахъ, и ма делахъ! Со а ду Далла гIуллакх деш
дерг, хьо а, Iийсах лаьцна долу тоьшалла лардеш болу хъан вежарий а
санна. Далла бен ма де Iибадат! XIунда аьлча Делера болчу хаамийн дух
Iийсах лаьцна долу тоьшалла ду».

КIайчу дин тIехъ волу дошло

- ¹¹ Суна гира дIаеллаелла стигал. Цигахъ лаьтташ кIайн дин бара. Цу тIе
хиъна Волчух тешаме Верг а, билггал волу бакъ Верг а олу. Цо кхел яр а, тIом
бар а нийсонца леладо. ¹² Цуьнан бIаьргаш йогуш йолчу цIерах тера ду. Ткъа
Цуьнан коьрта тIехъ дуккха а таьжнаш ду. Цунна тIехъ язйина, Цунна Шена
бен, кхин цхъанна а хууш йоцу цIе ю. ¹³ Цийно тIадийна оба яра Цунна
тIехъ. Беречун цIе «Делан Дош» ю. ¹⁴ Цунна тIаьхьахIиттина догIуш дара
стигалан эскарш. Церан дошлой кIайчу дойшна тIехъ бара, ткъа царна тIехъ
яра цIеначу дуткъачу лепаш долчу кIадих йина бедарш. ¹⁵ Цуьнан багара ира
тур схьадолура, халкъашна тIехъ толам баккхархьама. Аьчка гIожаца Цо
олалла дийр ду царна тIехъ. Массо а ницкъийн Делан оьгIазечу дераллин
муттдоккхургана чохъ Цо кемсаш хьобшур ю. ¹⁶ Цуьнан духар тIехъ а, хаьн
тIехъ а язйина иштта цIе ю: «Паччахьийн а Паччахъ, олахойн а Олахо».
- ¹⁷ TIаккха суна гира малхехъ лаьтташ долу цхъа малик. Цо, аз а ай-
дина, мохъ туьйхира стигална юккъехула тIемадаьлла доьдучу массо а

олхазаршка: «Тема а довлий, схягулло Делан доккхачу тойне. ¹⁸Аша дIадаа паччахьийн а, тIеман коьртачу хьаькакийн а, тIемалойн а дилха а, иштта дойн а, церан дошлойн а, паргIат болчу массеран а, леш болчеран а, лараме боцучеран а, цIеяхначийн а дилха а».

¹⁹ТIаккха суна гира экха а, дуьнен чуьра паччахьаш а шайн эскаршца цхьаьна. Уьш гулделлера оцу дин тIе хиьна Волчунна а, Цуьнан эскарна а дуьхьал тIом бан. ²⁰Амма экха а, цунна хьалха тамашийна билгалонаш еш хилла волу харцпайхамар а схьалецира. Оцу шен гIуллакхашца цо Iе-хийнера эхханан мухIар шайна тIедиллийтинарш а, эхханан суьртана Иибадат дийраш а. Экха а, харцпайхамар а, ший а дийна доллушехь, чохь саьмгал долчу а, цIе яьлла богучу а Iома чу тесира. ²¹Ткьа бисина болу кхиберш дин тIе хиьна Волчун багара схьадолучу туьраца байира. Дерриге а олхазарша шаьш дуьзалц церан дилха дира.

Цхьана эзар шарахь лаьттар долу паччахьалла

20 ¹Стигалшкара охьадуссу малик гира суна. Цуьнан карахь бух бо-
цучу Iинан догIа а дара, стомма зIе а яра. ²Шех иблис а, Делан мостагIа а олу, шира лаьхьа болу саьрмик, схьа а лаьцна, цхьана эзар шарна зIенашца дIабихкира малико. ³Цу саьрмике тIедогIу долчу цхьана эзар шарахь адамаш ца Iегадайтархьама, малико, иза бух боцучу Iин чу а тесна, и Iин дIакъевлира, неIарна мухIар а тухуш. И эзар шо чекхдаьлча, цхьа кIеззигчу ханна иза арахеца безар бу.

⁴Цул тIаьхьа суна гира паччахьан гIанташ. Царна тIе охьахиьна болче-
ран караделлера кхел яр. Делан дош дIасадаржорна а, Иийсах тоьшалла дар-
на а тIера кортош даьхна болчеран синош а гира суна. Я эхханна а, я цуьнан суьртана а Иибадат ца динера цара. Цу эхханан мухIар а тIе ца диллийтине-
ра цара я шайн хьаьжнаш тIе а, я куьйгаш тIе а. Цара, беллачуьра ден а бел-
ла, Дала леррина Кьобалвинчуьнца цхьаьна эзар шарахь паччахьалла дира. ⁵(Ткьа белла болу биснарш и эзар шо чекхдалалц денбелла бацара.) Нах беллачуьра дуьхььара денбалар ду иза. ⁶Декъала а, Дала даздина а ду-кх оцу нах беллачуьра дуьхььара денбаларехь дакьалоцу долу адамаш. ШолгIачу даларан олаллехь дац уьш. И нах Делан а, Дала леррина Кьобалвинчун а динан дай хир бу. Цара цхьана эзар шарахь Цуьнца паччахьалла дийр ду.

Иблисана тIехь толам баккхар

⁷И эзар шо чекхдаьлча, иблис чудоьллинчуьра дIахоьцур ду. Дуьненан еа а йистехь долу халкъаш, ГIогI а, МагIогI а, Iегадеш арадер ду и. Цо тIа-
ме схягулдийр ду, хIордан берда тIера гIум санна, дукха долу адамаш. ⁸Уьш дуьне мел ду дIадахара. Делан долахь болчеран меттаматтана го

^{19:20} Довзийтинарг 13:1-18. ^{20:2} Доладалар 3:1. ^{20:4} Даниал 7:9, 22. ^{20:8} Яхьазкхиал 7:2; Яхьазкхиал 38:2, 9, 15.

бира цара — иза Далла езна йолу гIала ю. ⁹Амма стигалара цIе йобссира, цу цIеро мостагIийн эскарш дIакхьаьлира. ¹⁰Ткьа уьш Iехош хилла долу и иблис цIе яьлла богучу саьмгалан Iам чу тесира. Цу Iам чохь экха а дара, харцпайхамар а вара. Цара дийнахь а, буса а Iазап хьобгур ду ерриг а тIе-йогIучу заманахь.

Адамашна тIехь тIаьхььара кхел яр

¹¹Цул тIаьхьа суна гира йоккха кIайн басахь йолу Iарш а, цигахь хиьна Берг а. И волчуьра стигал а, латта а кьайладелира, царна кхин меттиг ца йисира. ¹²ТIаккха суна гира лараме боцу а, цIеяхана хилла болу а белларш. Уьш Iаршана хьалха лаьтташ бара. Масех тептар схьадилира. ТIаккха кхин а цхьа тептар схьадилира — иза дахаран тептар дара. Цу тептаршна тIе дIаяздина долчу адамийн гIуллакхашка хьаьжжина, кхел йора оцу беллачарна. ¹³ХIордо а схьабелира шена чохь болу белларш. Шайна чохь болу белларш схьабелира Iожалло а, эхарто а. Царна хIоранна а, шайн-шайн гIуллакхашка хьаьжжина, кхел йира. ¹⁴Iожалла а, эхарт а цIе яьлла богучу Iам чу тесира. (И Iам шозлагIа валар ду.) ¹⁵Дахаран тептар тIе дIа-язвина мел воцург цIе яьлла богучу Iам чу тесира.

Керла стигал а, керла латта а

21 ¹Керла стигал а, керла латта а гира суна, хIунда аьлча хьалха хилла йолу стигал а, латта а хIинца дIадаьллера. ХIорд а кхин бацара. ²ТIаккха суна гира Делан гIала. Шен майрачунна кечдина долу нускалх тера йолу, Дела волчуьра стигалара охьайогIу керла Ярушалайм-гIала яра иза. ³Стигаларчу Iаршара айдина долу аз хезира суна. Цо бохура: «ХIин-ца Дела Iаш волу меттиг адамашна юкьахь ю! Дела цаьрца Iийр ву, ткьа царах Цуьнан халкъ хир ду. Церан Дела Ша и адамаш долчохь Iийр ву. ⁴Дала церан хIора бIаьрхи а дIадоккхур ду. ХIинца дуьйна кхин валар, я белхар, я тийжар, я лазар хир дац, хIунда аьлча хьалхалера хIуманаш дIадевлла».

⁵Iаршана тIе хиьна Волчо элира: «ХIинца Ас массо а хIума керла кхул-лур ду». ТIаккха Цо элира: «ДIаязде иза, хIунда аьлча хIара дешнаш те-шаме а, билггал бакъ а ду». ⁶Кхин а Цо соьга элира: «Со ву массо а хIума Долийнарг а, чекхдоккхун Берг а, церан Хьалхе а, Чаккхе а. Хьогах вол-чунна Ас бакъо лур ю дахаран хи долчу шовдан чуьра маьхза хи мала. ⁷То-лам баьккхинчунна и дерриг а дуьсур ду, ткьа Со цуьнан Дела а хир ву, иза Сан кIант а хир ву. ⁸Ткьа кIиллойн а, Иийсах тешар доцучеран а, вон

^{20:11, 12} Даниал 7:9, 10. ^{21:1} ЕшаI-ЯхIу 65:17; 66:22; 2 Кипин 3:13. ^{21:2} ЕшаI-ЯхIу 52:1; Довзийтинарг 3:12; ЕшаI-ЯхIу 61:10. ^{21:3} Яхьазкхиал 37:27; Iамальяр 26:11, 12. ^{21:4} ЕшаI-ЯхIу 25:8; ЕшаI-ЯхIу 35:10; 65:19. ^{21:6} ЕшаI-ЯхIу 55:1. ^{21:7} Дауд 7:14; За-
бур 88:27, 28.

болчеран а, адам дийначеран а, сийсаза лелачийн а, бозбунчийн а, харц-деланашна ламал еш болчеран а, массо а харцдуйчкеран а дакъа хир ду царах а, саьмгалх а богучу лам чохь. Иза шозлагла валар ду».

Керла Ярушалайм

⁹Тлаккха тлаьхьарчу заманан баланех дуьзна долу ворхI бога шайн ка-рахь долчу маликех цхьаь суна тIедеара. Цо соьга элира: «Схьавола, лаха-ро далон долу нускал гойтур ду ас хьуна». ¹⁰Суна тIе Делан Са доьссича, малико со боккхачу, лекхачу лам тIе ваьккхира. Цигахь цо суна гайтира стигалара Дела волчуьра охьайогIу еза Ярушалайм-гIала. ¹¹Делан сий-лалла яра цу гIалина чохь. Кьегаш болчу яспис олучу безачу тIулгах а, чекх са гуш долчу цIеначу ангалих а тера дара цуьнан лепар. ¹²Цу Яруша-лайм-гIалина гонах боккха а, лекха а пен бара. Цуьнан шийтта ков а дара. Кевнашкахь лаьтташ шийтта малик дара. Ткьа цу кевнашна тIе дIаязий-на Израилан халкъан шийтте а тайпанийн цIераш яра. ¹³Царах кхо ков малхбалехьа агIор дара, кхин кхоь — кьилбаседехьа, важа кхоь — кьил-бехьа, дисина кхоь малхбузехьа агIор дара. ¹⁴ГIалин и пенаш шийтта тIулган бух тIехь лаьтташ дара. Цу баххаш тIе дIаязийна лахаран шийтта векалан цIераш яра. ¹⁵Цу гIалин а, цуьнан кевнийн а, пеныйн а йохалла а, шоралла а, лакхалла а юста лерина дашо гIаж яра соьца къамел деш волчуьнгахь. ¹⁶И гIала биь са болуш дIахIоттийнера. Цуьнан йохалла а, шоралла а цхьатерра яра. Оцу гIожаца цо и гIала юьстира. Иза бIозза шийтта эзар сажа хилира. Ткьа цуьнан йохаллин а, шораллин а, лакхал-лин а барам цхьатерра бара. ¹⁷Тлаккха пеныйн лакхалла а юьстира мали-ко. Адамаша бустучу барамехь юстура малико. Пенаш цхьа бIе шовзткье диь дол лекха дара. ¹⁸И пенаш яспис олучу дезачу тIулгех дина дара. ГIа-ла ша а цIеначу деших йина яра. И деши, ангали санна, чекх са гуш дара. ¹⁹ГIалин пеныйн баххаш массо а тайпанарчу дезачу тIулгашца кечдина дара. Цхьана пенан бух яспис олучу, шолгIаниг — саппир олучу, кхоал-гIаниг — халкидон, боьалгIаниг — изумруд, ²⁰пхоьалгIаниг — сардоникс, йолхалгIаниг — сардис, ворхIалгIаниг — хризолит, борхIалгIаниг — ви-рил, уьссалгIаниг — топаз, уьтталгIаниг — хризопрас, цхьайтталгIаниг — яцинт, шийтталгIаниг — аметист олучу дезачу тIулгех бинера. ²¹ГIалин шийтта ков шийтта жовхIар дара. ХIора ков цхьацца жовхIарх дина дара. ГIалин коьртачу урамера некь цIеначу деших бинера. Урамаш чекх са гуш долчу ангалих тера дара.

²²Цу гIалахь Делан цIа ца гира суна, хIунда аьлча Далла Ибадат дечу цIийнан метта массо а ницкыйн Веза Дела а, лахар а Шаьш бу цу гIалахь. ²³Оцу гIалина иза серлаялийтархьама я малх, я бутт ца оьшу, хIунда аьлча

Делан сийлаллин нуьро серлайоккху иза. Лахар а цуьнан кьуьда бу. ²⁴Цу серлонгахь дуьненан халкъаш а лелар ду, дуьненарчу паччахьаша а шайн хьал дахьар ду цу гIали чу. ²⁵Оцу гIалин кевнаш дийнахь дIа а ца кьовлу, цигахь буьйса хир йоцу дела. ²⁶Халкъийн хьал а, хазна а цу гIали чу яхьар ю. ²⁷Цхьа а боьха хIума а, иштта сийсаза долу гIуллакхаш дийраш а, харц-дерг лелош берш а чубевр бац цу гIалина. Лахарехь долчу дахаран тептар тIехь цIераш язйина берш бен, цхьа а гIур вац цу чу.

22 ¹Тлаккха малико суна гайтира шена чохь дахаран хи долу шовда. ЦIеначу ангалих тера цIена хи дара иза. Делан а, лахаран а ларшера схьадолура и шовда. ²Иза гIалин коьртачу урамна юккьехула чекхдолура. Оцу чекхдолучу хин шинна а агIор лаьтташ дара дахаран дитташ. Цара цхьана шарахь шуьйттаза стом ло — хIора баттахь цкьа а луш. Ткьа дит-таш тIера гIаш халкъашна дарбана делла. ³Шайна неIалт кхайкхийнча-рах кхин хIумма а хир дац цигахь.

Эццахь Делан а, лахаран а ларш хир ду, ткьа Цуьнан ялхой а хир бу Цун-на ламал еш. ⁴Цигахь Делан юьхь а гур ю царна. Цуьнан цIе а хир ю церан хьаьжнашна тIехь. ⁵Буьйса а кхин хир яц цигахь. Кхин оьшур яц цигахь я стогаран, я малхан серло, хIунда аьлча Везачу Дала Ша лур ю царна серло. Цара, паччахьаша санна, олалла дийр ду ерриг а тIеьогIучу заманахь.

Ийса схьавар

⁶Малико соьга элира: «ХIара дешнаш тешаме а, билггал бакь а ду. Шен Сине пайхамарш иракарахIуьттуьйтуьчу Везачу Дала Шен малик да-хийтира кестта хила деза хIуманаш Шен ялхошна гайта».

⁷«Хаалаш, Со кестта воьIур ву. Декъала ву кху тептар тIехь дIаяздина долу Делера болчу хааман дешнаш лардеш верг!»

⁸Со, Яхьья, и дерриге а хезнарг а, гинарг а ву. И хIуманаш хезна а, гина а ваьлчачул тIаьхьа, уьш сайна гайтинчу маликан когашка вуьйжира со, цунна Ибадат дархьама. ⁹Амма малико соьга элира: «Варелахь, и ма делахь, хIунда аьлча хьо а, хьан динан вежарий болу пайхамарш а, кху тептар тIехь дерг мел лардийриг а санна, со а ду Цуьнан ялхо. Далла бен ма де Ибадат!»

¹⁰Малико кхин а элира соьга: «Кху тептар тIехь язбина болу Делера хаам кьайла ма баккхалахь, хIунда аьлча и дерриг а хир долу хан тIе-кхочуш ю. ¹¹Харцдерг лелочара кхидIа а леладоьла иза. Боьха лаамаш кхо-чушбийраш кхин а бехлойла. Делан лаамехь берш кхидIа а лелийла ба-кьонца. Далла гергахь цIена берш кхидIа а цIена лелийла».

^{21:10} Яхьазкхиал 40:2. ^{21:12}, ¹³ Яхьазкхиал 48:30-35. ^{21:15} Яхьазкхиал 40:3.

^{21:23} ЕшаI-ЯхIу 60:19, 20.

^{21:24} ЕшаI-ЯхIу 60:3. ^{21:25}, ²⁶ ЕшаI-ЯхIу 60:11. ^{21:27} ЕшаI-ЯхIу 52:1; Яхьазкхиал 44:9.

^{22:1} Яхьазкхиал 47:1; Закри-ЯхIу 14:8. ^{22:2} Доладалар 2:9. ^{22:3} Закри-ЯхIу 14:11; До-ладалар 3:17. ^{22:5} ЕшаI-ЯхIу 60:19; Даниал 7:18. ^{22:11} Даниал 12:10.

¹²Иийсас боху: «Со кестта воґур ву. Сан ял а Соьца ю, хІоранна а, ша динчу ґуллакхашка хьаьжжина, хьакъ дерг дІадалархьама. ¹³Со ву массо а хІума Долийнарг а, чекхдохкхун Верг а, церан Хьалхе а, Чаккхе а, Дуьх-хьарлераниг а, ТІаьххьарлераниг а».

¹⁴Декъала бу шайн духарш цІандинарш. Цундела церан бакъо хир ю, кевнехула чекх а бевлла, ґалин чу бовла а, дахаран диттана тІера стом баа а. ¹⁵ґалина арахь буьсур бу жІаьлех тера леларш а, бозбунчаш а, сийсаза леларш а, стаг вийнарш а, цІушна Іамал йийраш а, массо а харцонаш ян а лууш, уьш йийраш.

¹⁶«Аса, Иийсас, Сайн малик дахийтина динан тобанашкахь долчу шуь-га оцу хІуманех лаьцна хаам байта. Со ву Даудан Орам а, ТІаьхье а, Іуьй-ренан сирла Седа а».

¹⁷Делан Сино а, нускало а доьху: «Схьаволахь!» — бохуш.

И хезаш волчо а олийла: «Схьаволахь!»

Ша хьогах верг а схьавоґийла! Мала лууш волчо маьхза схьаоьцийла дахаран хи.

Чаккхе

¹⁸Кху тептар тІехь дІаяздина долу Делера болчу хаамийн дешнаш хезаш волчу хІоранга а Аса дІахьедар до: «Нагахь цхьаммо кху дешнашна тІе цхьа хІума тІетохахь, Дала цу тептар тІехь бийцина болу массо а баланаш тІебоуьйтур бу цунна. ¹⁹Нагахь кху тептар тІехь дІаяздина долчу Делера болчу хаамийн дешнех цхьа хІума тІера дІадаккхахь, Дала кху тептар тІехь дийцина долчу дахаран диттехь а, иштта йийцинчу езачу ґалина чохь а дакъалацар дІадохкхур ду цуьнан».

²⁰Кху дерригенах а тоьшалла деш Волчо боху: «И бакъ ду, Со кестта воґур ву».

Амин. Волахьа, Веза Эла волу Иийса!

²¹Веза Эла волчу Иийсан дика хуьлийла шуьца даим а.

^{22:12} ЕшаІ-ЯхІу 40:10; 62:11; Забур 27:4; ЕшаІ-ЯхІу 40:10; Ярми-ЯхІу 17:10.

^{22:13} Довзийтинарг 1:8; ЕшаІ-ЯхІу 44:6; 48:12; Довзийтинарг 1:17; 2:8. ^{22:14} Доладар 2:9; 3:22; Довзийтинарг 7:14. ^{22:16} ЕшаІ-ЯхІу 11:1, 10. ^{22:17} ЕшаІ-ЯхІу 55:1.

^{22:18}, ¹⁹ Карлабаьккхинарг 4:2; 12:32.